

Ña najánaha Jesucristo nu Juan

Tá nanaha Jesucristo mé á nu Juan

1 Ña yóho cúú ña nanaha Ndióxi nuú Jesucristo ña ná cuu jánaha mé á ña nuú na cúú cuéntá mé á. Ta nachindahá Jesucristo in táto mé á nuú yehe, da cúú Juan, da cája chúun cuéntá mé á já ná caxi tuhun táto mé á xihín i ndá a quea yaha chága chí nuu. Ta cúú á ña sa cáyati vaxi. ²Ta ndícani ndaa ndihi i sahá ña naxini i xihín nuú i ta nacahyí i tóco ndihi ña yóho. Ta nasahan Jesucristo tuhun a nuú i ña cúú á ña ndaa.

³Cajii ini ñayivi tá cáhvi na ña nacahyí i yóho ta cajii ini na xini johu na ña yóho nani cáhvi inga na ña jáchi cúú á ña naquixi cuéntá Ndióxi. Cajii ini ñayivi tá cája na ña cáchi a jáchi sa nacayati quiví coo tóco ndihi ña yóho.

Cáhyí Juan ña yóho nu ndíhusa ñuu nu ndítaca na cúú cuéntá Jesús

⁴Yehe cúú Juan ta cáhyí i carta yóho nuú ndíhusa ñuu nu ndúu na cúú cuéntá Jesús estado Asia. Ña cuni quea ná caja cuaha Ndióxi ñamani xihin ndó ta ná caja mé á ña ná coo vaha ini ndó. Mé Ndióxi íin a viti ta nasahjin a janda tá camaní cava sáhá saha ñuyiví ta quixi a ñuyiví yóho. Ta cuni ña ná caja cuahá ínima yii Ndióxi ñamani xihin ndo. Mé a cán cáa tátuhun usa ínima yii ta ndúu na nu Ndióxi, mé nu íin coo a cómi a cuéntá sahá indiví cán. ⁵Ta cuni ña ná caja cuahá Jesucristo ñamani xihin ndo, mé á cahán ña ndaa sahá ña naxini a. Ta mé á nasacuu ña nu cuítí nanditacu tañu na sa naxihi. Ta cómi a cuéntá saha tóco ndihi rey, na cómi cuéntá sahá ñayivi ñuyiví yóho. Ta quíhvi ini Jesucristo mí ta najándoo a cuachí tá naxita nii á ndica cruxu. ⁶Ta tóco ndihi mí, na cándée ini mé á najándique táhan mé á mí já ná cacomí a cuéntá saha yo. Ta nandaja mé á mí nanduú tátuhun jutú ña ná caja cáhnu yó Ndióxi, mé a cúú tátá Jesucristo. Cáhnu ná cacuu mé á anda ama cáa quiví jáchi íin ndée mé á caja tóco ndihi ñaha anda ama cáa quiví. Já ná coo.

⁷Sa nacayati quiví quixi Jesucristo tañu vico. Ta tóco ndihi ñayivi cuni ñahá ta janda na nasahní ñahá cán cuni na a. Ta tóco ndihi ñayivi ndúu ndijáá ñuu níi cúú saha ñuyiví canduu cuéha ndivaha ini na saha mé á. Já ná coo.

⁸Ta já cáchí Jesucristo, xitoho í saha mé á: “Yehe cúú mé a nu cuítí ta yehe cúú mé a nu ndíhí jáchí janda tá cámaní cava sáhá saha tóco ndihi ñaha sa íin va yehe ta coo tá coo i vatí ná ndihi sahá”, cáchí a. Mé a cúú Ndióxi, ña íin ndée cája tóco ndihi ñaha. Ta mé á íin a viti ta nasahíin a janda tá cámaní cava sáhá saha ñuyíví ta quixi a ñuyíví yóho.

Náha Jesucristo nu Juan ndá quiahva cáhnu cúú mé á

⁹Yehe cúú Juan ta cúú u ñani ndó, na cúú cuéntá Jesús. Ta sahá ña cándeé ini i Jesús sahá ña cán quéa ñañehe táhvi i xihín mé ndó cacomí Ndióxi cuéntá saha ndihí. Ta coó caja toho ña ná ndoho iní ñuyíví yóho jáchí sahan Ndióxi tuhun ndée iní já ná cuu caja ndeé iní tá ndóho iní. Natava xóo na yehe ta nasahan ñehe na yehe isla naní Patmos sahá ña naxica nuu i nacahan i tuhun Ndióxi, ña cúú ña ndaa, ña najánaha Jesucristo nuú i. ¹⁰Ta ndaja coo nandindaa quivi coo ña nasacu ini Jesucristo, xitoho í ta mé tañu já nachutú ndaa ínima i xihín ínima yii Ndióxi ta já naxini johó i cáhan cóhó in a chí jatá i ta nasacuu a tátuhun tá tiví na trompeta. ¹¹Ta mé tuhun naxini johó i cán nacachi a já xihín i:

—Yehe cúú mé a nu cuítí ta yehe cúú mé a nu ndíhí jáchí janda tá cámaní cava sáhá saha tóco ndihi ñaha sa íin va yehe ta coo tá coo i vatí ná ndihi sahá. Tóco ndihi ña ná cunún yóho xíní ñúhú cahyún ña nuú in libro. Ta já chindahún ña nuú ndihusa ñuu estado Asia nu ndúu na cúú cuéntá mí i. Chindahún ña nuú na ndúu ñuu Efeso xihín nuú na ndúu ñuu Esmirna xihín nuú na ndúu ñuu Pérgamo xihín nuú na ndúu ñuu Tiatira xihín nuú na ndúu ñuu Sardis xihín nuú na ndúu ñuu Filadelfia xihín nuú na ndúu ñuu Laodicea viti —nacachi a xihín i.

¹²Tá naxini johó i ña yóho já nandicoto nihni jatá i sándehe e yo cáhan xihín i. Ta já naxini i usa ña jiuahun cuáán nu sándójó ña túun. ¹³Ta tañu ña cán naxini i in a cúni coo tá cúni coo ñayivi ta ndíxi a in jáhma cáni ña janda sahá xínu coo a xihín quiahva cáni á. Ta naxini i ndacaan in cinturón ña jiuahun cuáán tóco á ta cáni a janda yati yicá ndíca a. ¹⁴Ta ijí jini á cúú á ña yaa cachi tátuhun yaa yucú yáhvá. Ta nduchú núú a cúú á tátuhun núhu ita. ¹⁵Ta tá quiahva yehe caa ña jándutu na ini horno quiahva já yehe sahá. Ta nihi ndivaha cáhan mé á ta cúú á tátuhun tá xójo cúyu ticuifí yuta tañu cáva. ¹⁶Ta naxini i núhu usa quimi ini ndahá cuáha mé á. Ta ini yúhu a naxini i quéta in yuchú cáni ña jeen ndíví xoo yúhu. Ta naxini i yehe ndivaha nuu á tá quiahva yehe candii caxivi ndaa.

¹⁷Tá naxini i mé á já nandicava i sahá tátuhun in ndii. Joo mé á nachinúu a ndahá cuáha jatá i já nacachi a já xihín i:

—A cáyhívi tohún. Yehe cúú mé á nu cuítí ta cúú u mé a nu ndíhí. ¹⁸Tácú tá tácú va yehe. Mé a ndaa nasacuu u ndii joo viti tácú u ta catacu

u anda ama cáa quivi. Ta yehe naquee vaha i tá nanditacu tucu u tañu ndii ta viti cómi i cuénta sahá nu ndúu ínima na sa naxihí. ¹⁹Xíní ñúhú cahyún ña naxinún. Ta xíní ñúhú cahyún sahá ña cúu viti ta já cahyún sahá ña coo chága chí nuu. ²⁰Ña yóho quéa cúni cachi ndíhusa quimi naxinún ñúhu ini ndahá cuáha i xihín ndíhusa ña jiuhun cuáan nu sándójó ña túun. Ndíhusa quimi cán cúu rí yuhú nuu in in na cómi cuénta sahá usa veñuhu nu táca na cúu cuénta Jesús. Ta ndíhusa nu sándójó ña túun cán cúu á yuhú nuu usa veñuhu. Ta ña yóho coo naxini ñayivi jáchi nasacuu a ña jehé.

Ña nacachi Jesús xihín na cúu cuénta mé á ndúu ñuu Efeso

2 'Cahyún in carta nuú da cómi cuénta sahá na cúu cuénta mí i ndúu ñuu Efeso. Ta ña cahyún cúu ña yóho: “Ña yóho cúu tuhun cáhan Jesús, mé a ñúhu usa quimi ini ndahá cuáha, mé a xíca nuu tañu usa ña jiuhun cuáan nu sándójó ña túun. Ta ña yóho quéa cáhan Jesús xihín ndó, na ñuu Efeso: ²Sa cándaa ndihi ini i ndá quiahva cája ndó. Cándaa vaha ini i ña ndúcú ndéé ndo cája chúun ndó cuénta mí i. Ta co jándacoo ndó chuun cája ndó cuénta mí i. Ta sa cándaa vaha ini i ña co ndéé ini ndó xihín ña cája ñayivi quini. Ta sa cándaa ini i ña sa naxito ndojó ndó na cáchi cúu apóstol cuénta Ndióxi joo co cúu toho na apóstol jáchi cúu ná na tuhún cuití va. ³Ta sa cándaa cáxi ini i ña co jándacoo ndó cája chúun ndó cuénta mí i. Ta cuahá ndivaha tañu ndóho ini ndó sahá i. Ta co cánaá ndó xihín ña yóho. ⁴Joo íin in ñaha cáhan cuachí i nu ndó saha: Ta ña cúni cáhan i saha cán quéa co cúni ga ndó yehe tá quiahva nacacúni ndó yehe janda mé saha. ⁵Ña cán quéa ndítahan ndicuhun ini ndó ndá quiahva nacacúni ndó yehe jihna. Ta ndítahan nu ndó ndicó coo ini ndó ta caja ndó tá quiahva nacaja ndó janda mé saha. Á tá coo ta xinu yachi i nu ndo ta tavá i ña cándójó, ña túun nu ndo. Caja i ña yóho xihín ndo tá ná a ndicó coo ini ndó. ⁶Joo mé a ndaa cájii ini i xihín ndo jáchi cándají ndó ña núu cája na xíca cuénta nicolaítas jan. Jáchi co táhán ri ini yehe xihín ña núu cája na jan. ⁷Cuni johó vaha ndó, na vaha johó ña cáhan ínima yii Ndióxi xihín na cúu cuénta mí i, na táca veñuhu: Ndá na ná quee vaha tañu tóco ndihi ña núu ñuyiví yóho, na cán cúu na quiahva i ñamaní nuu caxí cuihi cúun nu yító, dó cája ña ná catacu ñayivi anda ama cáa quivi. Mé yító cán cándichi dó nu íin Ndióxi.”

Carta cuahán nuú na cúu cuénta Jesús ndúu ñuu Esmirna

⁸'Cahyún inga carta cuhun nuú da cómi cuénta sahá na cúu cuénta mí i ndúu ñuu Esmirna. Ta ña cahyún nu ná cúu ña yóho: “Ña yóho quéa cáchi Jesús, mé a cúu á nu cuítí ta cúu á nu ndíhí, mé á sa naxihí ta já nanditacu tucu a. Ta já cáchi a já xihín ndó, na ñuu Esmirna: ⁹Sa xíní vaha i ndá

quiahva ndóho ini ndó. Ta xíní ndá quiahva cándáhví ndó. Joo mé a ndaa cúú ndó na cuicá nu Ndióxi. Ta sa xíní ndá quiahva cáhan núu na saha ndo jáchi cáchí na cúú ná na Israel joo a juú na. Cúú ná in táhndá na cája cáhnu Satanás, mé tiñáhá sacuahá va. ¹⁰A cáyihví toho ndó sahá ña vaxi nu ndó ndoho ini ndó. Jáchi ñayivi quini, na cúú cuéntá tiñáhá sacuahá taán na java ndohó vecaa já coto ndojó na ndohó. Ta tixi uxu quivi ndoho ini ndó. Ta xíní ñúhú cándeé tá cándeé ini ndó yehe vatí ná cahní na ndohó ta já ná caja i ña ñehe táhvi ndó catacu ndó anda ama cáa quivi. ¹¹Cuni johó vaha ndó, na vaha johó ña cáhan ínima yíi Ndióxi xihín na cúú cuéntá mí i, na táca veñuhu: Ndá na ná quee vaha nu tóco ndihi ña núu ñuyiví yóho, na cán cúú na a cúhun toho na ndoho ini na indayá. Jáchi tá ndóho ini ñayivi indayá cúú á tátuhun xihí na chí ivi.”

Carta cuahan nuú na cúú cuéntá Jesús ndúu ñuu Pérgamo

¹²Cahyún inga carta cūhun nuú da cómí cuéntá sahá na cúú cuéntá mí i ndúu ñuu Pérgamo. Ta já cachún já nu carta jan: “Jesús, mé a ñehe yúchu cáni ña jeen ndíví xoo yúhu cán quéa cáchí já: ¹³Sa xíní vaha i ña íin ndó ñuu Pérgamo nu cája Satanás, mé tiñáhá sacuahá ña cúní mé rí xihín ñayivi. Joo xihín ndinuhu ini ndó cája ndó ña táhan ini i xihín. Ta coo najándacoo ndó ña cándeé ini ndó yehe vatí naxini ndó ndá quiahva nacaja na xihín Antipas, mé da nacandeé cáhnu ini yehe cán. Jáchi nasahní na da mé ñuu jan nu cómí Satanás, mé tiñáhá sacuahá cuéntá sahá ñayivi. ¹⁴Joo íin in ñaha cáhan cuachí i nu ndó saha. Jáchi sahan ndó ñamaní nuú java ñayivi cán ña ná candico cáhnu na ña najánaha Balaam. Mé Balaam jan cúú dá da najánaha Balac ndaja caja da jácahan da na Israel caja na cuachi tátuhun ná cuxu na ña najoco ñayivi nuú yoco ta ná cuju xihín táhan ñayivi vatí co cúú ná yíi ná á ñájíhí na. ¹⁵Ta co íin vaha ini i xihín ndó, na ñuu Pérgamo jáchi sahan ndó ñamaní nuú java ñayivi ña ná candico na jatá na nicolaítas. Ta cándají ndivaha i ña jánaha na jan. ¹⁶Xíní ñúhú ndicó coo ini ndó ta caca vaha ndó íchí cuéntá mí i. Á tá coo ta saa yachí nu ndúu ndó jan. Ta xihín tuhun cahan i caní táhan i xihín na cája cuachi jan. Ta mé tuhun cahan i cacuu a tátuhun yúchu cáni ña cana yuhú u. ¹⁷Cuni johó vaha ndó, na vaha johó ña cáhan ínima yíi Ndióxi xihín na cúú cuéntá mí i, na táca veñuhu: Ndá na ná quee vaha nuú ña núu já quéa quiahva i ñamaní nu ná cuxu na pan yíi, ña cúú tátuhun maná, ña naquixi indiví. Ta ña yóho cúú á ña nasahin jehé nuú ñayivi. Ta já quiahva ri in yuú yaa nuú in in ñayivi nu ndaa quiví saá na. In túhún na ná ndiquehe yuú yaa cán cúú na xíní yo quiví quéa ndaa nu á.”

Carta cuahān nuú nā cúú cuéntá Jesús ndúu ñuu Tiatira

18'Caḥyún inga tucu carta ná cuḥun a nuú da cómí cuéntá saḥá nā cúú cuéntá mí i ndúu ñuu Tiatira. Ta já cachún já xihín ná: “ Ña yóho quéa cáchí Jesús, mé a cúú in túhún jiní já jahyi Ndióxi. Ta mé á quéa yéhe nduchú núú a tátuhun ñuhú ita ta yéhe saḥa tá quiahva yéhe caa, ña jándutu nā ini horno. Ta mé á cáchí a já xihín ndóhó, nā ñuu Tiatira: 19Sa xíní vaha i tóco ndihi ña cája ndó. Xíní vaha i ña cúní ndó yéhe. Ta xíní vaha i ña cándeé cáhnu ini ndó yéhe. Ta sa xíní vaha i ña co jándacoo ndó cája ndó ña cájii íní i xihín. Ta sa cándaā vaha ini i ña ndíhi chága ini ndó cája chúun ndó cuéntá mí i a juú ga tá načasáhá ndo cándeé ini ndó yéhe. 20Joo íin in ñaha ña cúní caḥan cuachí i xihín ndó saḥa. Jáchi co cúní ndó jánani ndó ña naní Jezabel, ña íin tañu ndó jan. Vatí cáchí ña ña caḥan ña cuéntá Ndióxi joo xihín ña quixi jiní mé ña jándahvi ña nā cúú cuéntá mí i. Jáchi jácaḥan ña nā ná cuju xihín táhan na, nā co cúú yíi ná á ñájíhí nā. Ta jánaha ña nā ña ná cuxu na ña najoco ñayivi nuú yoco. 21Sa nasandati ndivaha i ña ná ndicó coo ini ña saḥá cuachi cája ña joo co cúní ña jándacoo ña ña quíji ña xihín nā co cúú yíi ña. 22Saḥá ña cán quéa caja i ña ná quihvi ndeé ña candúhu ña xito ñá. Ta caja i ña ná ndoho ndivaha ini ndihi da quíji xihín ña tá ná a jándacoo da cuachi cája da xihín ña jáchi ña jan cúú ña najánaha ña nu dá caja da. 23Ta caja i ña ná quivi ndihi jahyi ñá. Ta xihín tóco ndihi ña yóho cuni nā cúú cuéntá mí i, nā ndúu ndijáá ñuu ña mé a ndaa xíní vaha i ña cáhvi ini ñayivi ta xíní ndaja íin ínima ná. Ta quiahva i nuú in in ndó ña ndítahan quehe ndó saḥá ña nacaja ndó. 24Ta viti cúní caḥan i xihín java ga ndó, nā cúú cuéntá mí i ndúu ñuu Tiatira jan. Jáchi co ndíco ndo jatá ña jánaha ña cán ta co ndíco ndó jatá ña cáchí ñayivi cúú ña ndíchí ndivaha cuéntá Satanás, mé tiñáhá sacuaḥa. Ña cúní cachi i xihín mé ndó quéa coó ga inga chuun sáhndá i nu ndo. 25Joo xíní ñuhú candita ndacú ndo janda quiahva ná saa i nu ndúu ndó jan. 26Ta ndá nā ná quee vaha nuú ña núu ñuyíví yóho ta cája na ña cúní yéhe xihín ndinuhu ini na janda quíví nu ndíhí já quéa caja i ña ná ñehe táhvi ná cahnda na chuun nuú ndijáá ñayivi ndúu ñuyíví. 27Tá quiahva nacaja Ndióxi, tátá i xihín i tá nasahan mé á ndée á nuú i quiahva já caja i xihín nā cándeé ini yéhe. Ñehe táhvi ná cacomí nā cuéntá saḥá ñayivi ñuyíví ta cuu caja na tá quiahva cúní mé ná. Ta cuu jándihi na saḥa mé ñayivi ñuyíví tá quiahva cája ñayivi tá táhvi nā quiji ndahyi. 28Ta quiahva ri yéhe ñamaní nuú nā cúú cuéntá mí i ña ná cacomí nā quimi cáhnu, rí quéta tá nativi. 29Cuni johu vaha ndó, nā vaha johu ña caḥan ínima yíi Ndióxi xihín nā cúú cuéntá mí i, nā táca veñuhu.”

Carta cuahān nuú nā cúu cuéntá Jesús ndúu ñuu Sardis

3 'Cahyún inga tucu carta cūhun nuú da cómí cuéntá sahá nā cúu cuéntá mí i ndúu ñuu Sardis ta já cachún já xihín dá: “Ñā yóho quēa cáchí Jesús, mé a ñúhu ínima yīi Ndióxi ini, ñā cúu ndíhusa yuhú nuu ínima yīi mé á. Ta mé á cómí a ndíhusa quimi ta ñā yóho quēa cáchí a xihín ndó, nā ñuu Sardis jan: Xíní vaha i tóco ndihi ñā cája ndó. Ta sa xíní vaha i ñā cáhán ñayivi ñā cája ndó tátuhun ñayivi tácu vatí mé a ndaa cúu ndó tátuhun ndii. ²Xíní ñúhú ndicaxi vaha ini ndó ta a jándacoo ndó ñā vaha cája ndó jan jáchi jalóho cúni ndihi sahá. Sándehé vaha i ñā co cája ndó ñā ndaa nu Ndióxi, tátá i. ³Xíní ñúhú ndicūhun ini ndó ñā nacatiahva ndó cuéntá mí i ta a jándacoo ndó caja ndó ñā. Ta xíní ñúhú ndicó coo ndó nu Ndióxi ta ndicáxi vaha ini ndó. Á tá coó ta jonáa cuití xīnu coo i nu ndo já caja vií i saha ndo. Mé quiví co cáhán ndo xīnu coo i nu ndo tá quiahva jonáa xīnu da cuihná. ⁴Joo mé a ndaa ndúu java ndó mé Sardis jan, nā coo nacaja quini mé xihín cuachi. Sahá ñā cán quēa cuu candixi na jahmá yaa ta já cuu caca tuun na xihín i jáchi iin sahá caja na já. ⁵Jáchi ndá nā ná quee vaha nuú ñā núu ñuyíví yóho já quēa candixi na jahmá yaa. Ta a jándoo i quiví ná nu libro, mé nu ndaa quiví tóco ndihi nā catacu anda ama cáa quiví. Ta nu Ndióxi, tátá i xihín nu táto mé á cahan cáxi i ñā jivi ndusa cúu ná cuéntá mí i. ⁶Cuni johó vaha ndó, nā vaha johó ñā cahan ínima yīi Ndióxi xihín nā cúu cuéntá mí i, nā táca veñuhu.”

Carta cuahān nuú nā cúu cuéntá Jesús ndúu ñuu Filadelfia

⁷'Cahyún inga tucu carta cūhun nuú da cómí cuéntá sahá nā cúu cuéntá mí i ndúu ñuu Filadelfia ta já cachún já xihín dá: “Ñā yóho quēa cáchí Jesús, mé á cúu ñā yīi ndivaha ta cúu á ñā ndaa. Ta nu mé á iin yávi, ñā nasacomí rey David. Ta tá súná mé á in yéhe ni in na a cuú chicaji ñā. Ta tá chicaji mé á in yéhe ni in na a cuú cuná ñā. Ta ñā yóho quēa cáchí a xihín ndó, nā ndúu ñuu Filadelfia jan: ⁸Xíní vaha i tóco ndihi ñā cája ndó. Nasuná i yéhe nu ndo ta ni in túhún nā a cuú chicaji ñā. Ta cándaa vaha ini i ñā cája tá cája ndó ñā nasahnda i nu ndo caja ndó vatí coo cuaha ndée ndó. Ta co chíjehé tuhun ndó ñā xíní ndó yehe. ⁹Candehé ndo ñā caja i xihín nā tuhún, nā cája cáhnu Satanás, mé tiñáhá sacuahā sahá ñā cáchí nā cúu ná nā Israel joo a juú toho na. Caja i ñā ná caxítí nā nu ndo já ná ndicuni na ñā mé a ndaa quíhvi ini i ndohó. ¹⁰Coó najándacoo ndó cája ndó ñā nasahnda i nu ndó caja ndó ta nasahan ndeé ini ndó sahá ñā cán quēa chindeé vi ndohó ná a ndóho toho ndó ñā núu vaxi jatá ñayivi ñuyíví yóho. Jáchi tá ná cayati mé hora já casáhá coto ndojó i tóco ndihi ñayivi ndúu ñuyíví. ¹¹Yachi saa i nu ndo. Ta coto a jándacoo ndó ñā cándeé ini

ndó yehe já quéa ná a ndíquiahva i nuú inga na ña sácú vaha i quiahva i nu mé ndó. ¹²Ta ndá na ná quee vaha nu tóco ndihi ña núu ñuyíví yóho, ndaja i na cán ná cacuu na tátuhun jihin, dó cúu ndée veñuhu Ndióxi, tátá i. Ta cán canduu na anda ama cáa quivi. Ta jata mé ná cahyí i quivi Ndióxi, tátá i. Ta sa mé yóho cahyí i quivi nuu nu íin Ndióxi. Mé nuu yóho cúu á inga Jerusalén, ña saá, ña vaxi chí indivi nu íin Ndióxi. Ta jivi jata mé ná cahyí i inga quivi saá i. ¹³Cuni johó vaha ndó, na vaha johó ña cáhan íima yii Ndióxi xihín na cúu cuéntá mí i, na táca veñuhu.”

Carta cuahan nuú na cúu cuéntá Jesús ndúu ñuu Laodicea

¹⁴Cahyún inga tucu carta cūhun nuú da cómi cuéntá sahá na cúu cuéntá mí i ndúu ñuu Laodicea ta já cachún já xihín dá: “Ña yóho quéa cáchi Jesús, mé a cúu ña ndaa. Mé a cáhan ña ndaa sahá ña naxini a xihín nuu á ta sahan tuhun a sahá. Ta mé á cúu á ña nacavaha tóco ndihi ñaha, ña sácú ini Ndióxi coo. Ta ña yóho quéa cáchi a xihín ndó, na ñuu Laodicea: ¹⁵Xíni vaha i tóco ndihi ña cája ndó. Ta xíni vaha i ña mé ndó co cúu ndó tátuhun in ñaha ihní ndinuhu. Ta ni co cúu ndó tátuhun in ñaha vixi ndinuhu jáchi co cája cáhnu ndó yehe xihín ndinuhu ini ndó. Vaha ná ndinuhu ña vixi ná cacuu ndó á tá ndinuhu ña ihní ná cacuu ndó. ¹⁶Joo mé ndó íin java uun ndó jáchi in ivi ndácaan íima ndo ta sahá ña cán quéa tavá xóo i ndohó nuú i. ¹⁷Jáchi mé ndó cáchi ndo ña cúu ndó na cuicá ndivaha. Ta cáchi ndo ña vaha ndivaha quéhe ndó jáchi ñéhe cuaha ndó jiuhún. Ta cáchi ndo ña ni in ñaha co ndímaní nu ndo. Joo mé ndó cúu ndó tátuhun na cuaá ndáhví ndivaha jáchi a ñaha cuni ndó ña co ñéhe táhví ndó nu Ndióxi. Cúu ndó na ndáhví ndivaha ta cúu ndó tátuhun na cuaá xíca lahla. ¹⁸Sahá ña cán quéa cúni jácahan i ndohó ña ná quixi ndó nuú i cueen ndó jiuhun cuaán nuú i ña sa naxito ndojó na nu núhu ita ta já quéa ná cacuu ndusa ndó na cuicá. Ta quiahva já ndítahan nu ndo cueen ndó jahmá yaa cachi nuú i candixi ndó já ná chijahví ndó mé ndó jáchi cacahan nuu ndó sahá ña xíca lahla uun va ndó. Ta sa mé nuú yehe ndítahan cueen ndó tata chicaan ndó nduchú núu ndo já quéa ná cuu candehé vaha ndó. ¹⁹Jáchi jánani i tóco ndihi ñayivi, na quíhvi ini i ta jándoho i ini na ña ná caja vaha na. Sahá ña cán quéa xihín ndinuhu ini ndó ndítahan ndicó coo ini ndó caja ndó ña cúni Ndióxi. ²⁰Candehé ndo. Yehe cúu u tátuhun in da cándichi cáni ndáha yéhe vehe ndó ta cána i ndohó. Ta ndá na xíni johó nu cáhan i ta súná na yéhe vehe na nuú i já quíhvi i vehe na ta cajíni i xihín ná ta mé ná cajíni na xihín i. ²¹Ta ndá na ná quee vaha nu tóco ndihi ña núu ñuyíví yóho, caja i ña ná cuu cacoo na xihín i indivi nuú cacomí i cuéntá saha ná indivi. Jáchi quiahva já naquee vaha i nuú ña núu ta viti íin coo i xihín Ndióxi, tátá i nu íin coo mé á

sáhndá chuun indiví. ²²Cuni johó vaha ndó, na vaha johó ña cáhan ínima yíi Ndióxi xihín na cúu cuéntá mí i, na táca veñuhu” —nacachi a.

Tá cája cáhnu na Ndióxi indiví

4 Tása nayaha tóco ndihi ña yóho já naxini i núná in yéhe indiví. Ta mé a naxini johó i nu cuítí ña cáhan tátuhun trompeta ta nacahan tucu a jatá i já nacachi a já:

—Cuáhán ndaa xoo chóho já ná naha i nuun ndá quéa coo chága chí nuu —já nacachi a já xihín i.

²Chí mé hora já nandeta nuu ínima yíi Ndióxi ini i. Já naxini i mé indiví cán in nu sácoo rey ta íin coo in a cán. ³Ta mé a íin coo cán nasayéhe nuu á tátuhun yéhe in yuu naní jaspe xihín yuu naní cornalina. Ta naxini i nacava nuu in coyánquí nu íin coo a. Ta mé coyánquí cán yéhe ri tá quiahva yéhe yuu cuíi naní esmeralda. ⁴Ta nu íin coo mé a cán naxini i nacava tiyivi inga oco comi táyi vaha nu sácoo na cómi chuun. Ta naxini i oco comi na sacuahá, in in na íin coo nuú in in táyi vaha cán. Ta ndíhoco comi mé na sacuahá cán ndíxi na jahmá yaa cachi. Ta cándójó in tiyivi jiuhun cuáán jini in in na cán. ⁵Ta naxini i ña quéta tasa nu íin coo mé a cán. Ta sa mé cán cáhndi tátuhun tá cána javi ta yati mé cán cáyi usa ití xihín ñuhú ita. Ta ña yóho cúu á ndíhusa yuhú nuu ínima yíi Ndióxi. ⁶Ta yati mé cán naxini i in ñaha ta náha tátuhun in tañuhú, ña yéhe tátuhun in yutátá.

Ta yati jiiñ nu íin coo a cán nacava tiyivi comi ña tácu. Ta chí a juú quiahva cuahá nduchú núu a chí nuu á ta chí jatá. ⁷Ta in táhan mé ña tácu cán, ña nu cuítí cán cáa tá quiahva cáa in León. Ta ña inga cán ña chí ivi cáa tá quiahva cáa tindiqui. Ta nuú ña cáhuni cán cúni coo a tá quiahva cúni coo nuú ñayivi. Ta ña comi cán cáa tá quiahva cáa in tiyaha tá ndáchí ri. ⁸Ta in in mé ña tácu yóho nasahiiñ inu ndíxi a. Ta nuu á ta jatá nachutú ndaa ña xihín nducú núu. Ta ni nuú ta ni ndiví co jándacoo ndícomi ña cán cáhan já cáchi a já:

Yíi ndivaha cúu mé ndó, Ndióxi, xitoho nde.

Ta cuu caja ndó tóco ndihi ñaha.

Mé ndó sa já íin va ndó tá nacava sáhá saha ñuyívi.

Ta sa já íin ndó viti ta já coo tá coo ndó anda ama cáa quivi

—nacachi ndícomi ña tácu cán.

⁹Ta tá cáhan mé ña tácu cán já cája cáhnu a Ndióxi ta ndíquiahva ndixahvi nu mé a íin coo nu sácoo rey, mé a tácu anda ama cáa quivi. Ta tá cáhan mé ña tácu cán ¹⁰Já ndícaxítí ndíhoco comi na sacuahá cán cája cáhnu na Ndióxi, mé a tácu anda ama cáa quivi. Ta já tíin na tiyivi cándójó jini na jáxinu na ña nu íin coo Ndióxi cán ta já cáchi na já:

¹¹ Ndióxi maní nde, cúú ndó xitoho nde ta ndítahan nuú nde caja cáhnu nde ndohó jáchi mé ndó ndítahan ndicáhnu ndivaha. Íin ndée ndo caja ndó tóco ndihi ñaha ta ndítahan caja cáhnu nde ndohó.
 Jáchi nacavaha ndó tóco ndihi ñaha,
 ta ndúu ndihi ñaha jáchi cúni mé ndó ña ná canduu a.
 Ta ndúu a jáchi cúni mé ndó cavaha ndó ña, já nacachi ndíhoco comí na sacuahá cán caja cáhnu na Ndióxi.

Tá naxini Juan in libro xihín in ndicachi

5 Tánandihi já naxini i in libro indiví ini ndáha cuáha mé a íin coo nu sácoo rey. Ta mé libro cán cúú á tutu nativí tuun a ta nacahyi ndíví xoo nu á. Ta ndájí tuun a xihín usa sello. ²Ta já naxini i in táto Ndióxi, ña íin ndivaha ndée a. Ta naxini johó i cáhan cóhó a ta ndáca tuhún a já cáchí a já:

—Ndá na cúú na íin saha cahnda ndíhusa sello yóho já ná cuná na mé libro ña nativí tuun cán —nacachi mé táto Ndióxi cán.

³Joo coó nañehe ná ni in na íin saha cahnda ndíhusa sello cán. Ni indiví ni ñuyiví ni nu ndúu na naxihí coó nandínehe ná ni in na cuu cahnda ndíhusa sello cán ña ná candehé na ña ndáa nu mé libro cán. ⁴Ta já nacasáhá sácu ndivaha i jáchi coó nandínehe ná ni in tuhún na íin saha cahnda ndíhusa sello cán ña candehé na ini mé libro cán cahvi na ña ndáa nu á. ⁵Joo in táhan na sacuahá cán nacachi a já xihín i:

—A cuácu gaún jáchi Jesús, mé á cúú tátuhun león, ña naquixi chichi Judá ta naquixi a chichi rey David, mé a cán naquee vaha ta nasahnu a nu tóco ndihi ña núu ñuyiví. Saha ña cán quea cuu cahnda ndíhusa sello ta já cuná mé á libro cán —nacachi a xihín i.

⁶Ta naxini i cándichi Jesús, mé á cúú tátuhun ndicachi loho tañu na sacuahá ta tañu ndícomí ña tácu cán. Ta mé a cúú tátuhun ndicachi loho cán cándichi a nu sácoo rey ta náha xicá ña najándicuehe na mé á tá nasahní ñahá na. Ta naxini i íin usa ndíqui a xihín usa nduchú núu a. Ta ña yóho cúú á ndíhusa yuhú nuu ínima yíi Ndióxi, ña nachindahá mé á nítí cúú sahá ñuyiví. ⁷Ta mé á cúú tátuhun ndicachi loho cán naxinu a ta natiin a mé libro cán ndahá cuáha mé á íin coo nu sácoo rey. ⁸Ta tá natiin a mé libro ña nativí tuun cán já nandica xítí ndícomí ña tácu cán xihín ndíhoco comí na sacuahá cán nu mé a cúú tátuhun ndicachi loho cán. Ta tóco ndihi na cán cánee arpa ndáha ná jácaha na. Ta cánee coho chíñíhmá, ña jiuhun cuáán ndáha ná ta nachutú ndaa ña xihín jusa támí sahan. Ta ña cán cúú yuhú nuu tuhun ña xicá tahví na cúú cuéntá Ndióxi nu á. ⁹Ta xihín ña saá xíta na caja cáhnu na mé á já cáchí na já:

Nu mé ndó cáni ndiquehe ndó mé libro jan ta cahnda ndó sello ña ná cuná ndó ña.

Jáchi mé ndó naxihi ndó nacaja ñayivi.

Ta tá naxita nii ndo já naxeen ndó ñayivi ná cacuu na cuéntá Ndióxi.

Ta mé ndó nachahvi ndó sahá na naquixi ndijáa chichi xihín na cáhan tá nuú tuhun xihín na ndúu ndijáa ñuu xihín ndijáa nación.

¹⁰Ta mé ndó nandaja ndó ñayivi yóho cacuu na tátuhun jutú já ná caja cáhnu na Ndióxi.

Ta mé na cán cacomí na cuéntá sahá ñayiví ndúu ñuyiví, cáchí na caja cáhnu na mé a cúu tátuhun ndicachi loho cán.

¹¹Tá nandihi já nasandehé tucu u. Anda já naxini johó i cáhan cuahá ndivaha millón táto Ndióxi caja cáhnu na mé á íin coo nu sácoo rey. Nacava tiyivi na ndúu na jatá ndícomi mé ña tácu cán xihín jatá ndíhoco comi na sacuahá cán. ¹²Ta já cáhan cóhó tóco ndihi mé táto Ndióxi cán já cáchí na já:

Mé Jesús, mé a cúu tátuhun ndicachi loho, rí naxihi nacaja ñayivi, íin sahá caja tóco ndihi ñaha xihín ndée á.

Ta íin sahá ndiquehe a tóco ndihi ña cuicá ta íin sahá ndiquehe ndihi a ña ndichí ta íin sahá ndiquehe a tóco ndihi ndée.

Ta íin sahá ña ná ndínehe jícó ñayivi mé á.

Ta íin sahá caja cáhnu na mé á ta íin sahá ña ná cata na nu mé á, cáchí tóco ndihi na cán caja cáhnu na mé á.

¹³Ta quiahva já naxini johó ri cáhan tóco ndihi ñaha ña nacavaha Ndióxi ndúu indiví xihín ña ndúu ñuyiví xihín ña ndúu tixi ñundáhyi ta xihín ña ñúhu ini tañuhú. Tóco ndihi ña nacavaha Ndióxi yóho caja cáhnu a mé á ta já cáchí a já:

Ná ndicáhnu ndivaha Ndióxi, mé á íin coo nu sácoo rey.

Ta ná ndicáhnu ndivaha Jesús, mé á cúu tátuhun ndicachi loho.

Ná caja cáhnu í mé á ta ná ndínehe jícó ñayivi mé á jáchi mé á quéa íin ndée caja tóco ndihi ñaha.

Ná caja cáhnu yó mé á anda ama cáa quivi, já cáchí tóco ndihi na cán.

¹⁴Já nanducú ñehe ndícomi mé ña tácu cán tuhun já cáchí a já:

—Já ná coo.

Ta tá nacachi a ña yóho já nacaxítí ndíhoco comi na sacuahá cán caja cáhnu na Ndióxi, mé á tácu anda ama cáa quivi.

Tá nasahnda Jesucristo ndíhusa sello

6 Tánandihi já naxini i nasahnda Jesús, mé á cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá nandihi já

naxini johō ī cáhan in táhan ndícomi mé ña tácu cán xihín ī ta tachī yúhu a cúu á tátuhun tá cána javi. Ta já nacachi a já xihín ī:

—Naha quí, candehún yóho —nacachi a xihín ī.

²Anda já nasandehé e ta já naxini ī in cuáyī cúxú ta naxini ī cánúu in dataa jata ri. Ta ndáha da cán naxini ī cáñee in arco. Ta naxini ī ña ñañehē dá in tiyivi cánúu jini dá. Ta cájií ínī da naqueta da jáchī cúu dá da sa naquee vaha ta ñehē táhvi dá quee vaha tucu da.

³Ta anda já naxini ī nasahnda Jesús, mé a cúu tátuhun ndicachi loho cán inga sello, ña cáhivī cán. Já naxini johō ī ña nacahan inga tucu táhan ndícomi mé a tácu cán xihín ī. Já cáchí a já xihín ī:

—Naha quí, candehún yóho —nacachi a xihín ī.

⁴Ta já naxini ī naqueta inga cuáyī ta cúu rí rí cuáhá. Ta mé da cánúu jata ri cán ñañehē táhvi dá jácani táhan da ñayivi ndúu ñuyívī. Ta ñañehē táhvi dá caja da ña ná cahní ndaja táhan mé ñayivi ndúu ñuyívī. Ta naxini ī ñañehē dá in yuchú cáni ña cáhnu cáñee a ndáha dá.

⁵Ta tá nasahnda Jesús, mé a cúu tátuhun ndicachi loho inga sello, ña cáhuni já naxini johō ī nacahan mé ña tácu, ña cáhuni cán xihín ī já nacachi a já:

—Naha quí, candehún yóho —nacachi a xihín ī.

Ta tá nasandehé e já naxini ī in cuáyī ndáhyí tūun ta já naxini ī ña cáñee in ña sácuita ñaha ndáha mé da cánúu jata rí cán. ⁶Ta tañu ndícomi mé ña tácu cán naxini johō ī cáhan in a ta já cáchí a já:

—Ndiví yaa xíní ñúhú caja chúun í já cuu cueén in túhún laá kilo trigo. Ta in quivi ní xíní ñúhú caja chúun í já cuu cueén uni kilo cebada. Joo a quiáhva ndó ñamanī ña ná tiví sítí xihín vino —nacachi a.

⁷Ta tá nasahnda Jesús, mé a cúu tátuhun ndicachi loho inga sello, ña cácomi cán já naxini johō ī nacahan mé ña tácu, ña cácomi cán xihín ī já nacachi a já:

—Naha quí, candehún yóho —nacachi a xihín ī.

⁸Ta tá nasandehé e já naxini ī in cuáyī cuáán johō. Ta da cánúu jata rí cája ña ná quivi ñayivi. Ta jata mé da cán naxini ī ndíco da sáhndá chuun sahá nu ndúu ndii. Ta ñañehē táhvi ndívī da cavaha da tondóhó ñuyívī já ná caja da ña ná cahní táhan cuáhá ndivaha ñayivi ndúu ñuyívī. Ta jári nasahní da na xihín tama ndeé ta xihín cuehe ta xihín ndijáá quití yúcu ndúu ñuyívī janda quiahva naxihī in táhndá nuú comi táhndá ñayivi ndúu níí cúu saha ñuyívī.

⁹Ta tá nasahnda Jesús, mé a cúu tátuhun ndicachi loho cán inga sello, ña cáhuhun já naxini ī in nu náa ta tixi mé cán ndúu ínima ñayivi, na naxihī sahá ña nacaxi tuhun na tuhun Ndióxi nuú ñayivi xihín ndinuhu ini na. ¹⁰Ta cáyuhú cóhó na já cáchí na já:

—Tátá Ndióxi, mé ndó cúú ndó ña yíi ndivaha ta cája ndó ña ndaa cuití va. Ta cuu caja ndó tóco ndihi ñaha. Ndaja cáa chá quiví caja víi ndó sahá ñayivi ndúu ñuyíví. Ta já caja ndó ña ná chahvi na sahá ña nacaja na nasahní na ndehe —cáchi na ndúu tixi náa cán.

¹¹Anda já ñahehe ná jahmá yaa candixi na ta natahnda chuun nu ná ña ná candati tóo chága na janda quiahva ná xinu coo nuú java ga na cúu cuéntá Jesús quivi na caja ñayivi ñuyíví sahá ña cája chúun na cuéntá Jesucristo. Ta janda quiahva ná quivi ndihi na yóho já cavií sahá ñayivi nacaja quini xihín ná.

¹²Tá nandihí já naxini i nasahnda Jesús, mé a cúu tátuhun ndicachi loho inga sello, ña cáhiñu cán. Já naxini i nataan ndivaha ta naxini i nanduu tuún candii tátuhun in jáhma tuún sá ndíxi na ndúu ndíí. Ta níi cúu yoo naxinu cuáhá nii ri. ¹³Ta ndijáa quimi naquee rí indiví ta nacuyu rí nu ñúhu. Cúu á tátuhun tá quíji nihni tachi ndeé ndivaha titó ñuhú ta já cuyu cuihi, rí cuíi nu ñúhu. ¹⁴Nandihí saha indiví ta nandacoo vaha ña tátuhun tá ndítivi in yívi ña co xíní ñuhú ga na. Ta tóco ndihi yucu xihín tóco ndihi isla mahnú tañuhú nandijama ndihi ña ta co ndúu ga ña nuú nasanduu a. ¹⁵Ta tóco ndihi na cómi cuéntá sahá ñuyíví nandacoo jehé na tañu cáva. Ta nachínee na tañu tóto chí yucu cuahan na. Ta cán nachijehé ri na sáhdá chuun nu soldado xihín tóco ndihi na cuicá xihín tóco ndihi na íin ndée cája ña náhnu ñuyíví yóho. Ta jári tóco ndihi na cómi in xitoho cuéntá saha xihín tóco ndihi na xíca núná mé nandacoo jehé na tañu cáva xihín tañu tóto cán. ¹⁶Ta cáchi na cáhan na xihín yucu ta cáhan na xihín cáva ña ná cuyu a jata ná ta ná chijehé a na ña ná a cúni mé a íin coo nu sácoo rey cán na. Ta yíhvi na Jesús, mé á cúu tátuhun ndicachi loho cán jáchi sa naxojo ini a ta vaxi a jándihí a saha ná. ¹⁷Jáchi sa naxinu coo quiví jándoho mé á ini na ta ni in na co ndée ini.

Ndíçaxi Ndióxi in táhndá na Israel

7 Tása nayaha tóco ndihi ña yóho já naxini i ndíta comi táto Ndióxi ndícomi xoo nu quíxi tachi nu ndícomi xoo níi cúu saha ñuyíví. Ta tíin a tachi já ná a cuicó ga tachi jatá ñuyíví ta ná a cuicó ga tachi nuú tañuhú ta ni nuú ni in yíto. ²Ta já naxini i naquixi inga táto Ndióxi xoo nu quéta candii. Ta mé táto Ndióxi yóho naxini i ñehe a sello Ndióxi, mé á tácu indiví. Ta já naxini johó i nacayuhú mé táto Ndióxi yóho nuú ndícomi java ga táto Ndióxi, mé na ñahehe táhvi caja ña núu xihín ñuyíví ta xihín tañuhú viti ta já nacachi a já xihín ná:

³—Candati ndó. A cája núu ndó xihín ñuyíví ta ni xihín tañuhú ta ni xihín ni in yíto. Jáchi jihna ñuhú xíní ñuhú cacú in sello taan na cúu cuéntá Ndióxi, mé a cája cáhnu mí —nacachi a.

⁴Ta naxini johō ī cāhan in a ndaja cúú ñayivi nanani sello yóho taan na. Cúú ná in ciento ivi jico comi mil ñayivi Israel ta cúú ná na naquixi ndíhuxu ivi chichi na Israel. ⁵In táhndá cúú uxu ivi mil na naquixi chichi Judá ta nanani sello taan na cán. Ta inga uxu ivi mil na naquixi chichi Rubén naquehe sello taan na. Ta quiahva já naquihvi ri sello taan uxu ivi mil na naquixi chichi Gad ⁶xihín uxu ivi mil na naquixi chichi Aser xihín uxu ivi mil na naquixi chichi Neftalí xihín uxu ivi mil na naquixi chichi Manasés ⁷xihín uxu ivi mil na naquixi chichi Simeón xihín uxu ivi mil na naquixi chichi Leví xihín uxu ivi mil na naquixi chichi Isacar ⁸xihín uxu ivi mil na naquixi chichi Zabulón xihín uxu ivi mil na naquixi chichi José xihín uxu ivi mil na naquixi chichi Bejamín nanani sello taan na.

Tá naxini Juan cuahá ndivaha ñayivi ndíxi jahmá yaa

⁹Tá nandihī já nasandehé e já naxini ī cuahá ndivaha ñayivi. Ta ni in na a cuú cahvi ñahá sahá ña cuaha cúú ná. Ta cúú ná na naquixi ndijáá chichi ñayivi ndúu ñuyíví. Ta cúú ná na cāhan tá nuú tuhun. Ta cúú ná na ndúu ndijáá ñuu xihín ndijáá nación ñuyíví. Ta naxini ī ndíta na nu Ndióxi, mé a íin coo nu sácoo rey. Ta ndíta na nu Jesús, mé a cúú tátuhun ndicachi loho cán. Ta tóco ndihī na ndíxi na jahmá yaa cachi ta cáñee ñuu ndáha ná.

¹⁰Ta tóco ndihī na cáyuhú cóhó na já cachi na já:

Ndióxi, mé a íin coo nu sácoo rey xihín Jesús,

mé a cúú tátuhun ndicachi loho cán najáacu a mí, cachi na.

¹¹Ta naxini ī ndíta tóco ndihī táto Ndióxi cája cáhnu na mé á íin coo nu sácoo rey. Ta nacava tiyivi na ndúu na jatá na sacuahā cán xihín jatá ndícomi mé ña tácu cán. Ta já nacaxítí tóco ndihī na janda quiahva nacani ndaa taan na nu ñúhu ta já nacasáhā na cája cáhnu na Ndióxi. ¹²Já cachi na já:

Já ná coo. Cája cáhnu nde ndohó ta ndíñehe jícó nde quivi mé ndó.

Jáchī ndíchī ndivaha jinī ndo ta ndiquiahva nde ndixahvi nu ndo.

Ta ndítahan coo toní ñúhú nde xihín ndo jáchī mé ndó cúú ndó ña íin ndée cája tóco ndihī ñaha.

Ta já ná coo tóco ndihī ña yóho nu mé ndó anda ama cáa quivi. Já ná coo, nacachi na cán cája cáhnu na Ndióxi.

¹³Anda já naxinu in táhan na sacuahā cán nuú ī já nandaca tuhún na yehe já nacachi na já xihín ī:

—A co xínun ndá na cúú na ndíxi jahmá yaa yóho ta ndá naquixi na —nacachi na xihín ī.

¹⁴Já nanducú ñehe e tuhun nu ná já nacachi ī já xihín ná:

—Yehe co xínī toho ī joo mé ndó sa xínī vaha ndó ndá na cúú ñayivi yóho —nacachi ī xihín ná.

Ta já nacachi na já xihín i:

—Na ndíxi jahmá yaa yóho cúu ná na nayaha nuú cuahá ndivaha tondóhó mé quivi tá nandoho ndivaha ini na. Ta viti sa nandoo cuachi na xihín nii Jesús, mé a cúu tátuhun ndicachi loho. ¹⁵Sahá ña cán quea ndíta na nu Ndióxi, mé á íin coo nu sácoo rey. Ta ñuú ta ndiví cája ndiví na nu mé á ini veñuhu a. Ta mé Ndióxi, mé a íin coo nu sácoo rey cán ndáá vaha mé á na jáchi íin tuun a xihín ná. ¹⁶Ta coo ga joco quixi nu ná ta ni a íchi ga ini na ticuí ta ni a cáyi ga na cája candii ta ni a ndíhi ga ini na sahá ña ihní. ¹⁷Jáchi Jesús, mé a cúu tátuhun ndicachi loho cán ndácaan mahñú nu sácoo rey cán ta candaa mé á na tá quiahva ndáá in pasto ndicachi jana dá. Ta candaca mé á na cuhun na nu cána ticuí, dó cája ña ná catacu na anda ama cáa quivi. Ta yacó Ndióxi ticuí nuu tócó ndihi na sácu —nacachi na sacuaha cán xihín i.

Tá nasahnda Jesús, mé a cúu tátuhun ndicachi loho cán inga sello, ña cáhusa

8 Tánasahnda Jesús, mé a cúu tátuhun ndicachi loho cán inga sello, ña cáhusa já nacatáji ní tócó ndihi ñaha indiví tátuhun tixi java hora. ²Tá nandihi já naxini i ndíta usa táto Ndióxi nu á. Ta in in mé táto Ndióxi cán nañehe ná in in trompeta. ³Já naxinu inga táto Ndióxi candichi a nu náa ña íin yati nu íin coo Ndióxi nu sácoo rey cán. Ta cáñee in coho chíñíhmá ndáha á, ña jiuhun cuáán. Ta nañehe á cuahá ndivaha jusa, ña joco a ña nu náa, ña nacavaha xihín jiuhun cuáán. Ta quiahva já joco ri a nu náa cán ña xíca tahví na cúu cuéntá Jesús nu Ndióxi. ⁴Ta mé ñihma nacana nuú coho chíñíhmá cáñee ndáha táto Ndióxi cán nandindita cuahan nu Ndióxi tá quiahva ndíndita ña xíca tahví na cúu cuéntá mé á nu á. ⁵Anda já natiin táto Ndióxi cán coho chíñíhmá ta já najácutú a ña xihín tití ñuhu, ña naquehe a nu náa cán. Ta já nacuihna ña jatá ñuyíví. Anda já nacasáha cáhndi tátuhun tá cána javi. Ta janda joho xójo cúu ta cána tasa ta naquixi in nditáan ndeé ndivaha jatá ñuyíví.

Tá nativí ndíhusa táto Ndióxi trompeta

⁶Tá nandihi já nasacanduu tiahva ndíhusa táto Ndióxi tiví na trompeta ña cáñee ndáha na.

⁷Ta in táhan ndíhusa táto Ndióxi cán nacasáha nativí a mé trompeta cán. Ta já nacuyu ñuhu cáyi xihín ñí ña nacava táhan xihín nii jatá ñuyíví. Ta chí nacayi in táhnda nuú uni táhnda ñuyíví yóho ta jari naquihvi ñuhu in táhnda nuú uni táhnda yíto ndíta yúcu ta jari yúcu cuí nacayi ndihi a.

⁸Tá nandihi já nativí táto Ndióxi ña cáhiví cán inga trompeta. Ta naxini i najaní tátuhun in yúcu cándaha xihín ñuhu cuahan ndicava nuú tañuhú.

Ta in táhndá nuú uni táhndá tañuhú cán nanduu dó nii. ⁹Ta in táhndá nuú uni táhndá tóco ndihi ñaha núhu ini tañuhú naxihí a. Ta quiahva já nandihí saha in táhndá nuú uni táhndá barco nasandojó nuú tañuhú cán.

¹⁰Ta táto Ndióxi ña cáhuni cán nativí a inga trompeta ta já naxini i naquee in quimi cáhnu cándaha xihín núhu ita vaxi rí ndícava rí ñuyíví. Naquee rí indiví ta nandicava rí nu núhu nuú in táhndá nuú uni táhndá yuta xihín chicoho nu cána ticuí. ¹¹Ta mé quimi cán naní rí ña ova. Ta nacaja rí ña nacahova in táhndá nuú uni táhndá ticuí. Ta naxihí cuahá ndivaha ñayivi tá naxihí na dó ova cán.

¹²Tá nandihí já nativí táto Ndióxi ña cácomi cán inga trompeta já nanaá in táhndá nuú uni táhndá nuú candii cán. Ta quiahva já nacaja ri a xihín yoo ta xihín quimi. Sahá ña cán queá coó nacuu tuun vaha candii xihín yoo xihín quimi cán. Ña cán queá nacamani tátuhun in táhndá nuú uni táhndá tuun candii cán jatá ñuyíví. Ta quiahva já nacamani tuun yoo xihín quimi ñuú.

¹³Tá nandihí já nasandehé e ta já naxini joho i cátí ndixi in táto Ndióxi ndáchí a mañnú indiví. Ta cáyuhú cóhó a já cáchí a já:

—Ay, ay, ay ndáhví nahá nacuu ñayivi ndúu ñuyíví jáchí ndají ndoho ini na tá ná tiví uni ga táto Ndióxi trompeta —cáchí a.

9 Tánandihí já naxini i nativí táto Ndióxi ña cáhuhun cán inga trompeta. Ta naxini i naquee in quimi indiví ta nandicava rí jatá ñuyíví. Ta nañehe táhvi rí cacomí rí yáví ña cuu cuná ri yáví cuná ndivaha, ña co xínu nu ndíhi nuu. ²Ta mé quimi nasuná ri yuyéhe mé yáví cuná já nandindita ñihma tátuhun ña ndíndita yúhu horno cáyí. Ta mé ñihma nacana cán najánaá nuú candii xihín nuú tachí viti. ³Ta tañu ñihma cán naqueta cuahá ndivaha tica, rí nandicuíta nuu níí cúú ñuyíví. Ta nañehe táhvi rí cacuu rí rí cuehe tá quiahva cuehe líhma. ⁴Ta natahnda chuun nu rí ña ná a jándihí toho rí sahá yucu ni sahá ñaha cuí ni sahá yitó cuí ñuyíví yóho. Jáchí natahnda chuun nu rí ña ná tiin rí ñayivi cuití va, na co cándaa marca Ndióxi taan. ⁵Joo coó nañehe rí ñamaní cahní rí na. Ña nacaja rí xihín ná queá ná tiin rí na ña ná cahma na tixi uhun yoo. Ta tá quiahva cáhma na tá tiin líhma na quiahva já cáhma na tiin rí na. ⁶Mé quívi já nducú ñayivi quívi vaha na joo a cúu quívi na. Vatí cúni quívi na joo a cúu quívi na.

⁷Mé tica tiin ñahá cán ndáa rí tá quiahva ndáa cuáyí, rí ndúu tiahva cuhun cani táhan. Ta tá quiahva cúni coo tiyívi, ña jiuhun cuáán sándójó jini rey quiahva já cúni coo ña cándójó jini rí cán. Ta tá quiahva cúni coo nuú ñayivi quiahva já cúni coo nuu ri. ⁸Ta tá quiahva íin ijí jini najihí quiahva já íin ijí jini ri. Ta tá quiahva ndáa nuhu león quiahva já ndáa nuhu rí. ⁹Ta jáhvi yicá ndíca mé tica cán xihín jahmá caa, ña sándixi

soldado cáni táhan na. Ta tá cáhma cáti ndixi ri cúu á tátuhun tá cáti saha cuaha cuáyí tá núhu rí carreta xínu rí cuahan rí cani táhan rí. ¹⁰Ta íin íñu ndóho ri ña tíin tátuhun ndohó líhma. Ta xihín ña cán nañehe táhvi rí tiin rí ñayivi ña ná cahma na tixi uhun yoo. ¹¹Ta mé da cómí cuéntá saha mé tica cán naní da Abadón tuhun hebreo ta naní da Apolión tuhun griego. Ta quivi dá cúni cachi a da jándihi saha tóco ndihi ñaha. Ta da cán cúu da cómí cuéntá saha yávi, ña co xínu nu ndíhi nuu cán.

¹²Sa nayaha in tondóhó cáhnu joo cámani ivi chága ña quixi.

¹³Tá nandihí já nativí táto Ndióxi ña cáhiñu cán inga trompeta ta já naxini johó i cáhan in a naqueta tañu ndícomí ndíqui quéta in in xoo tito nu náa, ña jiuhun cuáan, ña cándichi nu íin Ndióxi cán. ¹⁴Ta já nacachi mé a cán já xihín mé táto Ndióxi cáhiñu, ña ñehe trompeta cán:

—Janí ndícomí táto ña ndíco yuhú yuta cáhnu naní Eufrates jan —nacachi a.

¹⁵Tá nandihí já naxini i najani ndícomí táto nasandico cán ña ná cahni na in táhndá nuú uní táhndá ñayivi ndúu ñuyiví. Jáchí sa naquee jini va na chuun ña caja na ña yóho. Ta sa xini na ndá hora ta ndá quivi ta ndá yoo ta ndá cuia caja na ña. ¹⁶Ta naxini johó i cáhan in a ndaja cúu na soldado cándójó cuáyí cuahan cán. Ta cúu ná ivi ciento millón soldado.

¹⁷Ta cúni ndicani i nu ndo ndaja ndáa cuáyí jana ná, rí naxini i cán. Naxini i ña yóho tátuhun in sani joo co quíji toho i. Ta naxini i mé da cándójó cuáyí cán nachijahvi da yicá ndíca da xihín in caa, ña cúu á color cuáhá nii xihín color ndíhí ticayí xihín color cuáan ita. Ta ndáa jini cuáyí tá quiahva ndáa jini león ta yúhu ri quéta núhu ita xihín ñihma xihín azufre. ¹⁸Ta in táhndá nuú uní táhndá ñayivi naxihí na nacaja uní nuú tondóhó naquixi jatá ñuyiví yóho. Naxihí na xihín núhu cáyí ta xihín ñihma ta xihín azufre, ña naqueta yuhú cuáyí. ¹⁹Jáchí yúhu mé cuáyí cán xihín ndóho ri cúu nu ndácaan ndée ri. Tá quiahva ndáa coo quiahva já ndáa ndóho ri. Ta xihín mé yiquí jini coo cán cája quini rí xihín ñayivi.

²⁰Tóco ndihi java ga ñayivi, na coo nandihí saha xihín tondóhó naquixi jatá ñuyiví, na cán nacaja yii va na ña núu nasacaja na. Ta nacaja cáhnu yii va na ña quini. Ta coo najándacoo na cája cáhnu na yoco, ña nacavaha na xihín jiuhun cuáan ta xihín jiuhun cúxú ta xihín caa cuáan ta xihín yuu ta janda ña nacavaha na xihín yíto viti. Ta mé yoco yóho a cuú candehé a ta ni co tácu johó a ta ni a cuú caca nuu a. Joo nacaja cáhnu tá nacaja cáhnu na ña. ²¹Ta ni coo najándacoo na ña sáhní na ndii. Ta ni coo najándacoo na ña tají cája na. Ta ni coo najándacoo na ña ndúu na xihín na co cúu yí ná á ñájihí na. Ta ni coo najándacoo na ña cája cuíhná na.

Tá naxini Juan ña cánee in libro loho ini ndáha inga táto Ndióxi

10 Anda já naxini i inga táto Ndióxi, ña íin cuahá ndivaha ndée. Nānuu a indiví naquee a vaxi a tañu in vico ta cánúu in coo yánquí jini á. Ta yéhe nuu á tá quiahva yéhe candii. Ta sahá cúu á tátuhun ivi jihin cándaha xihin ñúhu. ²Ta ini ndáha mé á naxini i cánee in libro loho ña nativi tátuhun yivi joo nandindica ña. Ta nāchinúu mé á saha cuáha nuú tañuhú ta nāchinúu a saha íti a nu ñúhu. ³Ta nācayuhú cóhó a tátuhun tá ndáhyi león. Ta tá nācayuhú a já naxini johó i ña nācāhan cóhó usā tasa tá nācana ña. ⁴Tá nāndihi nācāhan ndíhusa tasa cán já nāducú u cahyí i ña nācachi a joo naxini johó i cāhan in a nāquixi chí indiví ta já cáchí a já xihín i:

—A cáhyún ña nācachi ndíhusa tasa nācana jan. Xíní ñúhú coo jehé a —nācachi mé a cán xihín i.

⁵Anda já naxini i mé táto Ndióxi ña cánúu in sahá nuú tañuhú ta inga sahá nu ñúhu cán, nāndiñehe a ndahá cuáha indiví. ⁶Ta já nācāhan mé á quivi Ndióxi ta já nācāhan tuhun a jáchi Ndióxi tácu a anda ama cáa quivi, mé á nācavaha indiví xihin ñuyivi xihín tañuhú xihin tóco ndihi ñaha íin nuu á. Ta já nācachi mé táto Ndióxi já:

—A cáyancá ga ⁷jáchi tá ná casáhá tiví táto Ndióxi ña cáhusa cán trompeta já xinu coo nu tóco ndihi ña nāsacu ini Ndióxi coo jehé janda sanahá. Jáchi sa nācaxi tuhun mé á xihín profeta cuéntá mé á ña ná cāhan nā sahá ña yóho nuú ñayivi —cáchí táto Ndióxi.

⁸Anda jáví naxini johó i nācāhan tucu mé táto Ndióxi indiví já nācachi a já xihín i:

—Cuáhán quehe libro loho núná nuu cán. Ndiquehe a ndáha táto Ndióxi, mé a cánúu in saha nuú tañuhú ta inga sahá nu ñúhu jan —nācachi a.

⁹Tá nāsaā i nu táto Ndióxi cán já nāxica i nu á ña ná quiahva libro loho cán nuú i. Ta já nāducú ñehe táto Ndióxi cán tuhun nuú i já nācachi a já xihín i:

—Yóho íin libro loho joo xíní ñúhú casún ña. Vatí mé a ndaa tá ná casún ña cacuu a tátuhun tá casún ñúñu jáchi caviji ndivaha yúhun caja ña. Joo tá nāndihi nduu a ña ova ini tísún —nācachi a xihín i.

¹⁰Tá nāndihi já natiin i mé libro loho ndáha táto Ndióxi cán ta já nāsaxí i ña. Ta nācaviji yuhú u xihin á tátuhun ñúñu. Joo tá sa nācocó i ña já nācāhova ña ini tixi i. ¹¹Anda já nātahnda chuun nuú i já nācachi a já xihín i:

—Ndítahan nuun caxi tuhun tucún xihín ñayivi ña cāhan Ndióxi sahá cuahá ndivaha ñuu xihín cuahá ndivaha nación nu cāhan nā ndijáá tuhun.

Ta xíní ñúhú caxi tühún ña nuú ndijáá na cómí cuéntá sahá ñuyíví
—nacachi a xihín i.

Ivi na cúu testigo

11 Tánandihi já nasahan na in yító vara, dó chiquiahvá nuú i. Ta tá
cúni coo ndoo já cúni coo mé vara cán. Ta já nacachi na já xihín i:

—Candichi ta chiquiahvún veñuhu cáhnu Ndióxi. Ta ndítahan
chiquiahvún nu náa Ndióxi viti. Ta ndítahan cahvún ndaja cúu na cája
cáhnu Ndióxi mé jan. ²Joo coto a chíquiahvún ñundáhyi, ña cáva nuu
ndícomí tito yéhe veñuhu cán. Jáchi sa nandíquiahva Ndióxi ña yóho nuú
ñayivi toho ña ná caja tá quiahva cúni mé ná xihín Jerusalén, ña cúu ñuu
yii ñaha Ndióxi tixi ivi jico ivi yoo. ³Ta já chindahá yehe ivi testigo, na
candixi jahmá ndáhyí, ña ndíxi ñayivi tá cándíí ini na. Ta cūhun na cāhan
na sahá yehe tixi in mil ivi ciento uní jico quivi —nacachi na.

⁴Ta naxini i ivi yitó olivo xihín ivi nu sándójó íti, dó cúu yuhú nuu
testigo ndíta nu Ndióxi, mé a sáhdá chuun nuú ñuyíví. ⁵Ta ni in na a cuú
caja ni in ñaha xihín ndíví testigo Ndióxi yóho jáchi cuu caja na ña ná cana
ñúhu ita ini yúhu ná ta cuu chicaan ñúhu na já ná jándihi na sahá na ihvi
na. Ta quiahva já quivi ndá na ná nducú caja xixi xihín ná. ⁶Ndíví mé
testigo Ndióxi yóho íin ndée ná chicaji na indiví já ná a cúun javi nani
cāhan na cuéntá Ndióxi nuú ñayivi. Ta íin ndée ná ndaja na ticuíí ña ná
nduu dó nij. Ta íin ndée ná chicaan na ndá cuehe cúni mé ná chicaan na
játá ñuyíví yóho. Ta núná nu ná caja na ña ndaja tañu cúni mé ná. ⁷Joo tá
sa nandihi nacahan ndíví testigo yóho xihín ñayivi janda javí quixi in quití
quini, rí queta tañu yávi, ña co xínu nu ndíhi nuu cán. Ta já cani táhan rí
xihín ndíví na cán ta quee vaha rí xihín ná ta cahní rí na. ⁸Ta já canduu
yiquí cuñu ndíví na cán mahnú java ndaa cáyé ñuu Jerusalén nuú nasahní
na Jesucristo, mé á cúu xitoho í. Ta mé ñuu Jerusalén yóho cúu á yuhú
nuu ñuu Sodoma xihín nación Egipto sahá cuachi cuahá cája ñayivi ndúu
cán. ⁹Ta ñayivi ndúu ndijáá ñuu xihín ndijáá nación xihín na cāhan tá nuú
tuhun xihín na naquixi ndijáá chichi cuni na yiquí cuñu mé testigo Ndióxi
yóho tixi uní quiví java. Ta a quiahva toho na ñamaní jánduxu na ndíví
testigo Ndióxi yóho. ¹⁰Ta ñayivi ndúu ñuyíví cajii ndivaha ini na sahá ña
naxihí ndíví testigo Ndióxi yóho. Ta cávatá na janda quiahva jasá ñaha nu
tāhan johu na sahá ña naxihí ndíví testigo Ndióxi, na najándoho ndivaha
ini ñayivi ñuyíví xihín ña nacahan na. ¹¹Joo tá sa nayaha uní quiví java
chí jánditacu Ndióxi ndíví testigo cán já ná ndacoo tucu na. Ta tá ná cuni
ñayivi ña yóho casáhá quiji ninu na xihín ña yíhví na. ¹²Anda já cuni johu
ndíví testigo cán in a cāhan cóhó indiví. Ta já cachi a já xihín ná:

—Cuándaa ndó chóho —cachi a já xihín ná.

Já ndaa na indiví tañu in vico nuú ndihi na ihvi na. ¹³Ta mé hora já taan ndeé ndivaha. Ta jándihi a in táhndá nuú uxu táhndá mé nuu cáhnu cán ta já quivi usa mil ñayivi. Ta na coó naxihí cán chutú ndaa na xihín ña yíhvi na ta já casáhá na caja cáhnu na Ndióxi, mé a íin indiví.

¹⁴Sa nayaha va tondóhó cáhivi. Joo sa cátivi tondóhó cáhuni vaxi a.

Tá nativí táto Ndióxi trompeta cáhusa

¹⁵Ta táto Ndióxi ña cáhusa cán nativí a inga trompeta. Ta tá nativí a do já naxini johó i cáhan cóhó cuaha ná indiví. Já cáchí na já:

Ta viti nandindaa hora sáhndá Ndióxi, xitoho í xihín Jesucristo chuun.

Ta mé á quea nachindahá Ndióxi cacomí a cuéntá sahá ñayivi.

Ta íin ndée a cahnda chuun nuú ñuyíví yóho anda ama cáa quivi, nacachi cuaha ná mé indiví.

¹⁶Ta ndíhoco comí na sacuaha, na nacava tiyivi nasanduu coo nu táyi vaha yati nu íin coo Ndióxi cán, nacaxítí na janda quiahva nacani ndaa taan na nu ñúhu ta nacaja cáhnu na Ndióxi. ¹⁷Já nacachi na já xihín á:

Ndíquiahva nde ndixahvi nu ndóhó, Ndióxi, xitoho nde, mé a íin ndée caja tóco ndihi ñaha.

Janda tá cámaní cava sahá saha ñuyíví nasahiin va mé ndó.

Ta sa já íin ndó viti ta quixi tucu ndó.

Ndáha mé ndó íin ndihi ndée viti sahá ña cán quea nacasáhá ndo sáhndá ndo chuun nuú ñayivi.

¹⁸Ta ñayivi ndúu níí cúú ñuyíví nacasáhá na xójo ndivaha ini na.

Joo viti naxinu coo quivi caja xixi ndó xihín na cán.

Ta viti naxinu coo hora caja vií ndó sahá na sa naxihí.

Ta sa naxinu coo hora chahvi ndó nuú na profeta, na cáhan cuéntá mé ndó.

Já naxinu coo hora chahvi ndó nuú na cúú cuéntá mé ndó, na cája cáhnu mé ndó,

ta coó caja toho a á cúú ná na náhnu á cúú ná na válí.

Ta naxinu coo hora jándihi ndó sahá ñayivi quini, na cája ña núu xihín ñuyíví yóho, cáchí na cán cája cáhnu na Ndióxi.

¹⁹Tá nandihí já naxini i nanuna yéhe veñuhu Ndióxi, ña íin indiví. Ta cán tívi ndácaan sató arca ñaha Ndióxi. Ta já nacasáhá cána tasa. Ta naxini johó i jandá johó vaa cúu tácu cáhan na. Ta nacasáhá cána javi ta táan ndeé ndivaha ta cúun ndivaha níí.

Naxini Juan ña ndúcú in coo quini caja xixi rí xihín in ñáñáha

12 Tánandihí já naxini i nayaha in ña xitúhún ndivaha indiví. Naqueta in ñáñáha, ná cátivi jáhma ña cúú candii. Ta cándichi ña

jatá yoo. Ta cánúu in tiyiví jini ná, ña nacacutú xihín uxu ivi quimi. ²Ta sa víxi ná cacu jahyi ná. Ta ndáhví ndáhyi ná jáchi ndóho ndivaha ini ná janda quiahva ná cacu jahyi ná. ³Tá nandihi já nayaha inga ñaha cáhnu indiví. Naxini i in coo quini, rí cuáhá. Ta íin usa jini rí xihín uxu ndíqui rí. Ta cánúu in tiyiví jatá in in yiquí jini rí cán. ⁴Ta mé coo quini cán nañuhu rí in táhndá nuú uní táhndá quimi ndúu indiví xihín ndóho rí. Ta já najani rí mé quimi cán jatá ñuyiví. Ta mé coo quini cán nandaca ndichi rí yati nu íin ñáñáha cácu jahyi cán jáchi cúni rí caxí rí jahyi ná tá ná cacu a. ⁵Tá nandihi já nacacu in ta jahyi ná, da cahnda ndeé chuun saha tóco ndihi ñayivi ñuyiví. Joo nasanehe Ndióxi a ninu nu íin coo mé á. ⁶Ta naxinu ñáñáha cán cuahan ná chí xoo yucú íchí jáchi mé cán sa nasacu tiaha Ndióxi nuú cuu coo ná coto ñahá tixi in mil ivi ciento uní jico quivi.

⁷Tá nandihi já nacasáha cúu tondóhó indiví. Ta naxini i Miguel xihín táto Ndióxi nacani táhan na xihín coo quini cán ta xihín táto mé rí. ⁸Joo coo nacu quee vaha coo quini cán xihín táto Ndióxi ña cán quea coo nacu canduu chaga rí cán indiví. ⁹Ña cán quea najacana Ndióxi mé rí cán janda ñuyiví yóho. Mé rí nasahin rí janda sanahá ndivaha. Ta naní rí Satanás, mé tiñáha sacuaa, rí jandahvi tóco ndihi ñayivi ndúu ñuyiví. Mé rí xihín tóco ndihi táto rí ndíco jatá rí najacana Ndióxi rí janda ñuyiví yóho.

¹⁰Tá nandihi já naxini johó i cáhan cóhó in a indiví já cáhí a já:

—Sa naxinu coo quiví cacu ndaa ínima ñayivi jáchi cómí Ndióxi cuénta saha ná xihín ndée mé á. Ta sa naxinu coo quiví cahnda Jesucristo chuun, mé a nachindahá Ndióxi cacomí cuénta saha ñayivi. Saha ña cán quea sa nataxí Ndióxi tiñáha sacuaa nu íin mé á jáchi nuú ta ndiví nasahin rí nu mé á chicaan rí cuachi jatá na cúu cuénta Jesús. ¹¹Mé na cúu cuénta Jesús naquee vaha na xihín rí saha ña nacaja Jesús, mé a cúu tátuhun ndicachi loho tá naxita nii á ndica cruxu saha ná. Ta naquee vaha na xihín rí jáchi coo najandacoo na cáhan na ña ndaa saha Jesús. Ta co yíhví toho na quivi na saha mé á. ¹²Tóco ndihi ndó, na ndúu indiví xini ñúhú cajii ini ndó. Joo ndáhví nahá nacu na ndúu ñuyiví xihín na ndúu ini tañuhú. Jáchi xójo ndivaha ini tiñáha sacuaa ta nanuu rí caja xixi rí xihín ndó jáchi cánda vaha ini rí ña sa ja chá cuití cúni ndihi saha rí —nacachi a indiví.

¹³Tá nacandaa ini mé coo quini cán ña najacana Ndióxi rí ñuyiví já nacasáha rí ndicuita ñee rí ñáñáha, ná nacacu jahyi cán. ¹⁴Joo nanehe ná ivi ndixi náhnu ndivaha, ña cúu tátuhun ndixi tíyaha. Saha ña cán quea nandachí xicá ña nu mé coo quini cán cuahan ná yucú íchí nuú nasahin ná. Ta cán coto na ña tixi uní cuia java. ¹⁵Tá nandihi já nacaja mé coo quini cán ña ná queta cuahá ndivaha ticuifí yúhu rí. Ta já nacavaha rí in yuta jáchi cúni rí jatañu rí mé ñáñáha cán. ¹⁶Joo nachindee ñundáhyi

ñáñáha cán jáchi nandata ta naxihi ndihi a ticuiñ nacana yúhu mé rí cán.
 17Ta xihín ña yóho ví ga ví naxojo ini coo quini cán xihín ñáñáha. Sahá ña
 cán quéa naquee rí cuahan rí cani táhan rí xihín java ga táhan na naquixi
 chichi mé ñá. Mé na yóho cúu ná na cája ña sáhdá tuhun Ndióxi ta co
 jándacoo na cája na ña ndaa ña najánaña Jesucristo nu ná.

Tá naxini Juan ivi quití quini

13 Tá cándichii nuú ñutí yuhú tañuhú já naxini i naqueta in quití
 quini tañu tañuhú cán. Ta nasahiin usa yiquí jíní rí xihín uxu
 ndíqui rí. Ta cánúu in tiyivi jatá in in ndíqui rí. Ta ndaa tuhun ña cánañá
 xihín Ndióxi nuú in in yiquí jíní rí. 2Mé quití quini naxini i yóho, cáa rí tá
 quiahva cáa ndicaha. Ta saha rí ndaa ña tá quiahva ndaa saha oso. Ta
 yúhu rí cúu á tátuhun yúhu león. Ta mé coo quini cán nasahan rí ndée rí
 nu mé quití quini, rí naqueta ini tañuhú yóho ña ná cuu cacomí rí cuéntá
 sahá ña cómí mé coo quini cán cuéntá saha. Ta cúu cája rí ña cúu cája mé
 coo quini. 3Ta in táhan ndíhusa yiquí jíní mé quití quini cán nandicuehe
 cáhvi ña. Joo tá nandihí já nandivaha ña. Sahá ña cán quéa ndaja táhan
 ñayivi ndúu ñuyiví nacatontó ndivaha na. Ta já nacasáhá na ndíco na jata
 mé quití quini cán. 4Ta nacaja cáhnu ñayivi coo quini cán jáchi nasahan rí
 ndée rí nuú quití quini cán. Ta quiahva já nacaja cáhnu na mé quití quini
 cán já cáchi na já:

—Coó ga inga rí cáhnu chága nu quití quini yóho. Ta ni in rí a cúu
 quihvi cani táhan xihín rí —cáchi na cája cáhnu na mé quití quini cán.

5Ta mé quití quini cán nañehe rí ñamaní ña ná cahan rí tuhun quini
 ndivaha, ña jándihihvi rí Ndióxi. Ta nañehe rí ñamaní cahnda rí chuun tixi
 ivi jico ivi yoo. 6Sahá ña cán quéa nacasáhá cahan quini rí saha Ndióxi ta
 jándihihvi rí mé á xihín ña núu cahan rí. Ta cahan núu rí saha mé nu ín
 Ndióxi cán xihín saha tóco ndihi na ndúu indiví. 7Ta nañehe rí ñamaní
 cani táhan rí xihín na cúu cuéntá Ndióxi janda quiahva quee vaha rí xihín
 ná. Ta nañehe rí ñamaní cahnda rí chuun sahá ndaja táhan ñayivi naquixi
 ndijáá chichi xihín na cahan tá nuú tuhun xihín na ndúu ndijáá ñuu xihín
 ndijáá nación. 8Tóco ndihi ñayivi ñuyiví caha cáhnu na quití quini cán
 jáchi janda tá cámaní cava sáhá saha ñuyiví coó nacahyi toho quivi ná nu
 libro nu ndaa quivi tóco ndihi na catacu anda ama cáa quivi. Mé libro
 yóho ín a nu Jesús, mé á cúu tátuhun ndicachi loho, rí naxihi ndica crúxu.

9Cuni johó vaha ndó, na vaha johó. 10Ndá na ná chicaan in na vecaa,
 cuhun ri mé va na vecaa. Ta ndá na ná cahní inga na xihín yuchú cáni,
 xihín yuchú cáni quivi ri mé va na. Sahá ña cán quéa xíní ñúhú quiahva
 ndeé ini na cúu cuéntá Ndióxi ta xíní ñúhú candeé cáhnu ini na mé á.

¹¹Tá nandihí já naxini i inga tucu quití quini, rí naqueta nuú ñundáhyi. Ta nasahin ivi ndiqui ri ta ndáa ña tá quiahva ndáa ndiquí ndicachi. Joo cáhan rí tátuhun cáhan in coo quini. ¹²Ta nacaja chúun rí tóco ndihi ndée mé quití quini nu cuítí cán nu íin mé rí. Nacaja rí ña ná caja cáhnu tóco ndihi ñayivi ndúu ñuyíví mé rí naqueta nu cuítí cán. Jáchí nandicuehe cáhvi jini rí nu cuítí cán joo nandivaha rí. ¹³Mé inga quití quini cáhvi cán nacaja cuahá ndivaha rí ñaha xitúhún. Nacaja rí ña ná quixi núhu cáyi chí indiví ta naxinu a nacuyu a ñuyíví nu tóco ndihi ñayivi. ¹⁴Ta najándahvi rí ñayivi ndúu ñuyíví xihin tóco ndihi ña xitúhún, ña ñañehe rí ñamani caja rí yóho nu mé rí nu cuítí cán. Ta nasahnda mé inga rí cán chuun nuú ñayivi ñuyíví ña ná cavaha na in tiniñu yúu quití quini nu cuítí cán. Mé rí nandicuehe quini ndivaha ri xihín yuchú cán joo nandivaha rí. ¹⁵Ta mé rí cáhvi cán ñañehe rí ñamani ña jánditacu rí tiniñu yúu mé rí nu cuítí cán já ná cuu cahán ri. Ta já ná cuu cahnda rí chuun ña ná cahní rí ñayivi, na co cúni caja cáhnu mé rí quini cán. ¹⁶Ta mé rí cáhvi cán nacaja rí ña ná quihvi marca ndahá cuáha ñayivi á taan na. Ta coo caja toho a á cúu ná na valí á na náhnu, á cúu ná na cuicá á na ndahví. Ta ni coo caja toho a á cúu ná na xica núná, á cúu ná na cómi xitoho cuéntá saha. Nu tóco ndihi ñayivi naquihvi marca nacaja mé rí cán. ¹⁷Ta ni in ñayivi a cuú cueen na ñaha ta ni a cuú jicó na ñaha tá coo nanani mé marca cán na. Ta tá co cándaa quivi mé quití quini, rí nu cuítí cán taan na á tá coo numero mé rí cándaa taan na já quea a cuú cueen na ñaha jáchi numero yóho náha ndaja naní mé rí nu cuítí cán. ¹⁸Xihín ña yóho cuu cándaa ini ndó ndá na cúu na ndichí jini. Ndá ndó, na cándaa ini xini núhu jitá ndo cuéntá xihin numero ña cúu quivi mé rí nu cuítí cán jáchi cúu á tátuhun quivi ñayivi. Ta numero yóho cúu á iñu ciento uní jico iñu.

Tá xíta in ciento ivi jico comi mil ñayivi cája cáhnu na Ndióxi

14 Tánandihí já naxini i Jesús, mé á cúu tátuhun ndicachi loho cándichi a jata yucu naní Sión. Ta xihin mé á ndíta in ciento ivi jico comi mil ñayivi, na ndáa quivi Jesús taan, mé a cúu tátuhun ndicachi loho cán. Ta quiahva já ndáa quivi Ndióxi, tátá a taan na. ²Ta naxini johó i in a cáhan chí indiví. Ta tá cáhan mé a cán cúu á tátuhun tá níhi cúyu ticuí tañu tóto. Ta níhi a tátuhun tasa tá cána. Ta tácu a tá quiahva tácu nu jácaha cuahá ndivaha na arpa. ³Ta naxini johó i ña saá xíta mé in ciento ivi jico comi mil ñayivi nu íin coo Ndióxi cán xihín nuú comi mé ña tácu cán xihín nuú na sacuahá cán. Mé na xíta cán cuití va cúu na cuu catiahva cata na ña jáchi cúu ná na nacaxi Ndióxi jácacu a tañu ñayivi ndúu ñuyíví. ⁴Ta na yóho cúu ná na vií, na coo nacaja quini mé jáchi coo nasanduu na xihín najihí. Cúu ná na nasandico ní tiempo jata Jesús, mé a cúu tátuhun

ndicachi loho. Cúú ná nā nācaxi Ndióxi jácacu a nū cuítí ñā ná joco a nā nū mé á xihín nū Jesús, mé a cúú tátuhun ndicachi loho. ⁵Ta ni in tálaá ñā tūhún coó nācāhan nā. Ta ni in na coó nācuu ñehe ínī chícaan cuachi jata ná.

Tá cáhan unī táto Ndióxi tūhun vaha sahā Jesucristo nuú ñayivi ndúu ñuyíví

⁶Tá nāndihi já naxini i inga táto Ndióxi ndáchí a mahnú ndaa indiví. Ta ñehe a tūhun vaha sahā Jesucristo ñā ínī anda ama cáa quiví caxi tūhun a ñā nuú ñayivi ndúu ñuyíví, mé nā nāquixi ndijáá chichi xihín nā cáhan tá nuú tūhun xihín nā ndúu ndijáá nuu xihín ndijáá nación. ⁷Ta já cáyuhú mé táto Ndióxi cán já cáchí a já:

—Xíní ñúhú cayihví ndó Ndióxi ta xíní ñúhú caja cáhnu ndó mé á jáchi sa naxinu coo quiví caja víí mé á sahā ñayivi. Xíní ñúhú caja cáhnu ndó mé á jáchi mé á quēa nācavaha indiví xihín ñuyíví ta mé á quēa nācavaha tañuhú xihín ndijáá nū cána ticuítí —cáchí táto Ndióxi cán.

⁸Tá nāndihi já naxini i inga táto Ndióxi ta já nācachi a já:

—Ay, ay, sa nāndihi va sahā nuu cáhnu naní Babilonia xihín sahā ñayivi nasanduu jan. Ta nā jan nasacuu na nā najánaha ichí quini nuú ñayivi ndúu ñuyíví já ná caja na tá nuú ñā núu. Joo viti sa nāndicava va mé Babilonia —cáchí táto Ndióxi, ñā cáhiví cán.

⁹Tá nāndihi já naxini i nāqueta inga táto Ndióxi, ñā cáhuní. Ta nācasáhá cáyuhú cóhó a já cáchí a já:

—Ndá nā ná caja cáhnu quití quini xihín tiniñu yúú rí ta sáhan na ñamaní ñā ná nāni marca mé rí cán taan na á ndáha nā ¹⁰já quēa ndoho ndivaha ini na caja Ndióxi jáchi xójo ndivaha ini mé á xihín ñayivi quini. Jácana Ndióxi nā nū cándaha ñúhu cáyí xihín azufre ta candehé tóco ndihi táto Ndióxi ta candehé Jesús, mé a cúú tátuhun ndicachi loho cán ñā ndóho na. ¹¹Ta cána ñihma ini nū ñúhu mé nā ndóho ini cán anda ama cáa quiví. Ta ni nuú ni ndiví co ndíquehe ndée ná nū ndóho ini na jáchi nācaja cáhnu na quití quini cán xihín tiniñu yúú rí ta nasahan na ñamaní ñā nānani marca quiví rí cán yiquí cuñu na. ¹²Xíní ñúhú quiahva ndeé ini nā cúú cuéntá Ndióxi, mé nā cája tóco ndihi ñā sáhndá Ndióxi ta co jándacoo na ñā cája cáhnu na Jesús —cáchí táto Ndióxi cáhuní.

¹³Tá nāndihi já naxini johó i nāquixi in a cáhan chí indiví já nācachi a já xihín i:

—Cahyún ñā ná cáhan i xuhun yóho: “Viti ta chí nuu cajii ini nā naxihí, nā cāndeé ini Jesús, xitoho na” —cáchí a.

Ta já cáchí ínima yii Ndióxi já:

—Mé a ndaa cajii ini na cán jáchi ndiquehe ndée ná sahá ña nacaja chúun vaha na cuéntá mí i. Ta ña vaha nacaja na cán coo a ní tiempo xihin ná —cáchi ínima yii Ndióxi.

Tá jándoho Ndióxi ini ñayivi

¹⁴Tá nandihi já nasandehé e ta já naxini i in vico yaa. Ta cánúu in da cáa tá quiahva cáa in ñayivi jatá mé vico. Ta cánúu in tiyivi jiuñun cuáan yiquí jíní da ta cáñee in machiti tojo jeen ndáha dá. ¹⁵Tá nandihi já naqueta inga táto Ndióxi ini veñuhu Ndióxi cán ta já cáyuhú cóhó a já cáchi a já xihin mé da íin coo jatá vico cán:

—Xíní núhú casáhún jáqueún ña íin ñuyíví xihín machiti tojo ñéhún jan jáchi sa naxinu coo va hora jáqueún ña íin jatá ñuyíví jáchi sa nachichi va viti —nacachi a.

¹⁶Anda já naxini i nacasáha mé da nasanúu jatá vico cán jáquihvi da machiti tojo da jatá ñuyíví ta já najáquee da ñaha jatá ñundáhyi.

¹⁷Tá nandihi já naxini i naqueta inga tucu táto Ndióxi ini veñuhu íin indiví cán ta quiahva já cáñee inga machiti tojo jeen ndahá a. ¹⁸Ta nu íin nu náa mé veñuhu cán naqueta inga táto Ndióxi, mé a cómí cuéntá saha núhu ita ña cáyi. Ta já nacahan cóhó a xihin mé táto Ndióxi nu cuítí cán, ña cáñee machiti tojo jeen ndáha cán já nacachi a já:

—Xíní núhú jáquihvún machiti tojo jeen cáñee ndáhun jan ta casáha cahndún uva cúun nu dó uva ndúu ñuyíví jáchi sa nachichi uva nu do —nacachi a.

¹⁹Anda já jáyaha táto Ndióxi cán machiti tojo nuú ñundáhyi ta já nasahnda ndihi a uva nu tó uva cán ta nataán a uva cán ini in pila cáhnu ña ná cuhní ri. Ta ña yóho náha ndá quiahva quini ndoho ini ñayivi caja Ndióxi jáchi xójo ndivaha ini a xihin ná sahá cuachi cája na. ²⁰Ta tá nasuhní uva cán ini mé pila cáhnu yuhú ñuu cán já nacana nii, dó cúú tátuhun yuta cúná janda quiahva cani ndaa dó yati yuhú in cuáyí. Ta tá quiahva cáni xíca dó cuahan do cúú á tátuhun uní ciento kilómetro.

Tá xínu coo táto Ndióxi xihín usa chága tondóhó quixi jatá ñuyíví

15 Tánandihi já naxini i inga tucu ña cáhnu chí indiví ta chí nacatontó i. Ta ña naxini i cúú usa táto Ndióxi ta in in ña yóho ñéhe a chága tondóhó quixi jatá ñuyíví ña ná jándihi a ña xójo ini Ndióxi.

²Ta naxini i in ñaha ta náha tátuhun in tañuhú ta tá quiahva íin nuú yutátá quiahva já íin nuu do joo cúú dó dó cáva táhan xihín núhu cáyi. Ta yati jín mé tañuhú náha tátuhun yutátá cán ndíta ñayivi, na nacandéé nasahnu nu tóco ndihi ña núu sahá ña coo nacaja cáhnu na quití quini xihín tiniñu yúu ri. Ta ni coo naquehe na túni ña cúú numero mé rí quini

cán. Ta mé na ndíta cán cáñee arpa ndáha na, dó nasahan Ndióxi nu ná.
³Ta xíta na ña naxita Moisés, mé da nacaja chúun cuénta Ndióxi. Ta xíta na ña naxita Jesús, mé a cúu tátuhun ndicachi loho cán ta já cáchí na já:

Cátóntó nde tá xíní nde tóco ndihi ña nacavaha mé ndó, Ndióxi,
 xitoho nde,

jáchí in ndée ndó caja ndó tóco ndihi ñaha.

Íchí cuénta mé ndó cúu á íchí ndacú ta cúu á íchí cuénta ña ndaa.

Ta mé ndó cúu ndó ña cómi cuénta sahá ndaja táhan nación ndúu ñuyíví yóho.

⁴Tóco ndihi ñayivi yíhvi na ndohó, mé a cúu xitoho nde ta cáhan na ndaja cáhnu cúu mé ndó.

Jáchí in túhún mé ndó cúu ndó Ndióxi yíi.

Ta tóco ndihi ñayivi ndúu ndijáa nación xínu na caja cáhnu na mé ndó, jáchí náha ndá quiahva cája ndó ña ndaa, cáchí na xíta na.

⁵Ta tá sa nayaha ña yóho já nasandehé ta naxini i nanuna veñuhu indiví, ña nacavaha na xihín ñíi quítí. Ta nasañuhu ley Moisés cán. ⁶Ta ini mé veñuhu indiví naqueta ndíhusa táto Ndióxi, mé a ñéhe usa nuú tondóhó quixi jatá ñuyíví. Ta ndíxi táto Ndióxi cán jahmá vií, ña lino, ña ndató ndivaha yéhe. Ta ndácaan in cinturón ña jiuhun cuáán tóco á ta cáni a janda yati yicá ndíca a. ⁷Ta in táhan ndícomi mé ña tácu cán nasahan in in cóhó, ña jiuhun cuáán nuú in in táhan ndíhusa táto Ndióxi cán. Ta ini in in cóhó cán núhu ndaja táhan tondóhó ña vaxi jatá ñayivi ndúu ñuyíví caja Ndióxi, mé a tácu anda ama cáa quívi. ⁸Ta naxutú ndaa veñuhu cán xihín ñihma, ña náha ndá quiahva cáhnu cúu Ndióxi xihín ndá quiahva cáhnu cúu ndée mé á. Ta ni in na cóo ñañehé ñamaní quíhvi ini veñuhu cán janda quiahva naxínu ndíhusa tondóhó, ña ñéhe ndíhusa táto Ndióxi cán.

Usa cohó ña núhu usa tondóhó

16 Tánandihí já naxini johó i nacahan cóhó in a tañu veñuhu indiví cán. Ta já cáchí a xihín ndíhusa táto Ndióxi cán já:

—Cuáhán ndó cuyu ndó ndíhusa cohó jan jatá ñuyíví. In in a cán cúu á in tondóhó chindahá Ndióxi jatá ñuyíví ta ndoho ndivaha ini ñayivi xihín á —cáchí a.

²Anda já in táto Ndióxi, mé a nu cuítí nasahan nacuyu a ña núhu ini cohó ñéhe a cán jatá ñuyíví. Ta já naxínu cuehe táhyi, ña ihvi ndivaha yiquí cuñu ñayivi, na naquehe marca quití quini cán, mé na nacaja cáhnu tiniñu yúu ri.

³Tá nandihí já inga táto Ndióxi ña cáhivi cán nacuyu a ña núhu ini cohó ñéhe a jatá tañuhú. Ta tóco ndihi dó nanduu dó ñíi tátuhun níi ndíi. Ta tóco ndihi ña tácu ini tañuhú cán naxihí ndihi a.

⁴Ta tá nandihí já nacuyú táto Ndióxi ña cáhuní cán ña ñúhu ini coho ñéhe a jata ndijáa yuta xihín ndijáa nu cána ticuúí ta nanduu dó nii. ⁵Tá nandihí já naxini johó i cáhan in táto Ndióxi, mé a cómí cuéntá sahá ticuúí cán já cáchí a já:

—Tátá Ndióxi, mé ndó cája ndó ña ndaa jáchi nacaja vií ndó sahá ñayivi jan. Yii ndivaha cúú ndó ta íin ndó viti ta janda saha nasahíin ndó.

⁶Najándoho ndó ini ñayivi jan jáchi nasata na níí nā cúú cuéntá mé ndó xihín níí nā profeta tá nasahní ñahá nā. Joo viti nacaja ndó xihín ná ña ná coho na nii já ná ndoho ini na. Ta quiahva já cáni a coo a —nacachi táto Ndióxi cán.

⁷Tá nandihí já naxini johó i in a cáhan nu náa Ndióxi cán já cáchí a já:

—Tátá Ndióxi, mé ndó cúú ndó xitoho nde ta íin ndée ndó caja ndó tóco ndihí ñaha. Ta nacaja ndó ña ndaa tá nacaja vií ndó sahá ñayivi —cáchí a.

⁸Tá nandihí já naxini i inga táto Ndióxi ña cácomí cán ta nacuyú a ña ñúhu ini coho ñéhe a jata candii. Ta xihín ña yóho nañehé candii cán ndée á chicaan ñúhu a ñayivi xihín ñúhu cáyi. ⁹Ta já nacayi quini ndivaha tóco ndihí ñayivi. Joo coó naxeen na ndicó coo ini na ta ni coó nacaja cáhnu na Ndióxi. Nā nacaja na quea nacasáhá nā cánahá ndivaha na xihín Ndióxi, mé a íin ndée nu tóco ndihí tondóhó quíxi jata ñuyíví yóho.

¹⁰Tá nandihí já naxini i inga táto Ndióxi, ña cáhuhun cán ta nacuyú a ña ñúhu ini coho ñéhe a jata táyi nu íin coo quití quini cán. Ta já naxini i nacanaá yávi mé nu ndúu na sáhdá rí chuun nu cán. Ta já nacasáhá mé nā cán sáxí yihí nā yáa ná jáchi nacasáhá ndóho ndivaha ini na. ¹¹Joo coó najándacoo na ña núu cája na. Ta sahá ña nacihihi ndivaha yiquí cuñu na cán xihín cuehe ndóho na já nacanahá ndivaha na xihín Ndióxi, mé a íin indiví.

¹²Tá nandihí já naxini i inga táto Ndióxi, ña cáhiñu cán ta nacuyú a ña ñúhu ini coho ñéhe a jata in yuta cáhnu naní Eufates. Ta já nahichi ndihí ticuúí nasáñuhu ini yuta cáhnu cán ta já nanuná nuú yaha nā cúú rey, nā naquixi chí xoo nu cána candii.

¹³Tá nandihí já naxini i naqueta uní ínima quini. In rí naqueta yúhu coo quini ta inga rí naqueta yúhu quití quini ta inga rí naqueta yúhu da cúú profeta túhún cán. Ta mé ínima quini cán ndaa tá quiahva ndaa láhva cúhndó. ¹⁴Ta rí cán cúú ínima rí quini, rí nacaja ña xitúhún nuú ñayivi. Ta cúú rí rí queta cuahan jataca ndaja táhan rey sáhdá chuun nuú ñayivi ndúu ñuyíví já ná cani táhan na xihín Ndióxi. Jáchi sa nacayati quiví ñaha ndá quiahva cáhnu cúú Ndióxi jáchi mé á quea íin ndée cája tóco ndihí ñaha. ¹⁵Anda já nacachi Ndióxi já: “Cuéntá coo ndó jáchi tá quiahva jonáá xinu da cuíhná quiahva já jonáá xinu i nu ndo. Íin saha cájii ini ndá nā sa ndátí tiahva saa i jáchi cúú ná tátuhun nā nasandíxi tiahva jáhma. Já quea

ná a cácahan nuu ná tá ndáa lahla na nuú ñayivi”, cáchí a. ¹⁶Ta rí quini cán najátaca rí tóco ndihi rey sáhdá chuun nuú ñayivi in nuú naní Armagedón tūhun hebreo.

¹⁷Tá nandihí já inga táto Ndióxi ña cáhusa cán nacuyu a ña núhu ini cohó ñéhe a nu táchi. Ta já naxini johó i cáhan in a ini veñuhu indiví nu íin coo Ndióxi nu sácoo rey cán. Ta cáhan cóhó á já cáchí a já:

—Sa nayaha tóco ndihi ña ndítahan coo —nacachi a.

¹⁸Tá nandihí já naxini i nacasáhá cána tasa. Ta naxini johó i jandá vaa johó cúu tácu cáhan na. Ta naxini johó i jandá johó cána javi. Ta nacasáhá quíji nīnu ñundáhyi jáchi nacasáhá táan ndeé ndivaha. Ta mé nditáan yóho nasacuu a ña ndeé chága nu tóco ndihi ña táan jáchi jandá quiví nasacu Ndióxi ñayivi ñuyiví coo naquixi inga nditáan ndeé tátūhun ña yóho. ¹⁹Ta mé ñuu cáhnu ndivaha cán nandata uní ña. Ta ndijáa ga ñuu náhnu ndúu ñuyiví nacuyu ndihi a. Ta nandicūhun ini Ndióxi sahá ñuu cáhnu naní Babilonia cán ta najándoho mé á ini na ndúu cán jáchi xójo ndivaha ini a xihín ná. Ta ña ndóho na cúu á tátūhun xíhi na vino cuéntá tondóhó. ²⁰Ta tóco ndihi isla núhu ini tañuhú xihín ndijáa java ga yucu ndúu jata ñundáhyi nandihí sahá. ²¹Ta naxini i nacuun ñíí náhnu ña vee ndivaha tátūhun ivi jico kilo in in a. Ta jandá indiví naquee a nacuyu a jata ñayivi ndúu ñuyiví. Ta nacasáhá na cánahá na xihín Ndióxi sahá ña najácuyu a ñíí yóho jata ná. Jáchi mé a ndaa ña yóho nasacuu a in tondóhó cáhnu ndivaha naquixi nu ná nacaja Ndióxi.

Tá jándihí Ndióxi sahá ña xíca jii

17 In táhan ndhūsa táto Ndióxi ña cánee in táhan usa cohó ndáha cán naxinu a nuú i já nacachi a já xihín i:

—Naha quíí yóho jáchi cúni jánaha i nuun ndá quiahva ndoho ini ña xíca jii, ña cáhnu, ña íin coo nuú cuahá ticuíí. ²Tóco ndihi na cúu rey ndúu ñuyiví yóho naquiji na xihín ña cán. Najáxini ña tóco ndihi ñayivi ñuyiví xihín ña núu nacaja ña tá naquiji ña xihín na co cúu yí ña —nacachi táto Ndióxi cán xihín i.

³Anda já nacaja ínima yii Ndióxi xihín i ña ndáca táto Ndióxi yehe nasahan i yucú íchí xihín á. Ta cán naxini i in ñáñáha cánúu jata in quití quini, rí cuahá. Ta níí cúu rí nacacutú xihín tūhun quini ña cánahá xihín Ndióxi. Ta naxini i íin usa yiquí jíní rí xihín uxu ndíqui rí. ⁴Ta mé ña cánúu jata rí cán ndíxi ña jáhma ndíhí ticayí, ña nacava táhan xihín ña cuahá. Ta nacacutú ña xihín jiuhun cuáán xihín yuu yáhví ndivaha xihín perla. Ta naxini i cánee in cohó jiuhun cuáán ndáha ña. Ta nachutú ndaa cohó cán xihín ña núu ta xihín ña tiquíni nacaja ña xihín dataa. ⁵Ta ndáa in tūhun taan ña, ña co cándaa ini ñayivi. Ta já cúni cachi mé tūhun cán:

“Ñuu Babilonia cúú ñuu cáhnu ta cúú á tátuhun náná tóco ndihi najihí xíca jii. Ta cúú á tátuhun náná ndaja táhan ga ña núu ndúu ñuyíví yóho.” ⁶Tá nandihí já náha ña naxini ndivaha mé ñáñáha jáchi naxihi ná ní na cúú cuéntá Ndióxi, na naxihí sahá ña coó najándacoo na cáhan na saha Jesús. Ta tá naxini i ña yóho já nacatontó ndivaha i. ⁷Ta já nacachi táto Ndióxi cán já xihín i:

—Ndá cuéntá quéa catontó nahún. Xíní ñúhú cuni johó vahún ña cáhan i xuhun jáchi ndicani i nuun ndía cúní cachi ña íin jehé saha ñáñáha yóho. Ta jári ndicani i nuun ndía cúní cachi quití quini, mé rí cánúu ñá, rí íin usa yiquí jíní xihín uxu ndíqui cán. ⁸Mé quití quini naxinún yóho nasatacu rí sanahá joo viti co tácu ga rí. Joo vaxi quiví ndindita rí ta queta rí tañu yávi, ña co xínu nu ndíhi nuu cán. Ta tá nandihí já cuhun rí ndihi saha rí chí uun. Ta catontó ndivaha tóco ndihi ñayivi ndúu ñuyíví, na coó nacahyí quiví janda tá cámaní cava sáhá saha ñuyíví nu libro nu ndáa quiví tóco ndihi na catacu anda ama cáa quiví. Catontó ndivaha na tá ná cuni na mé quití quini yóho, rí nasahin sanahá ta co tácu ga rí viti joo nditacu tucu rí nu ná.

⁹Ta ndá ndó, na ndíchí jini, cuu candaa ini ndó ña yóho: Ndíhusa yiquí jíní quití quini cán cúú á yuhú nuú usa yúcu nu íin coo mé ñáñáha xíca jii cán. ¹⁰Ta jári cúú á yuhú nuú usa rey. Ta uhun táhan rey yóho sa nandihí va saha. Ta inga táhan rey yóho sáhndá da chuun nuú ñayivi viti ñúhú. Ta inga ga rey ña cáhusa cán cámaní xínu coo. Joo tá ná xínu coo da yóho já a cóo nahá toho da cahnda da chuun nuú ñayivi. ¹¹Ta quití quini, rí nasatacu sanahá ta viti sa coó ga rí, rí cán cúú rí yuhú nuu rey, da cáhuna cán. Vatí cúú dá táhan java ndíhusa rey cán joo tá nandihí cahnda da chuun cuhun da ndihi saha dá chí uun.

¹²Ta ndíhuxu ndíqui naxinún yóho cúú á yuhú nuú uxu rey, mé na cámaní casáhá cahnda chuun nuú ñayivi ndúu ñuyíví. Joo in tálaá hora ñehe táhvi na cahnda na chuun xihin mé quití quini cán nuú ñayivi tátuhun rey. ¹³Ta ndíhuxu rey yóho jándique táhan na tuhun na ña ná quiahva na ndée ná nu mé quití quini já ná cahnda rí chuun. ¹⁴Ta caní táhan ndíhusa na cán xihin Jesús, mé a cúú tátuhun ndicachi loho cán. Joo quee vaha Jesús xihin ná jáchi cúú á xitoho na náhnu ndúu ñuyíví yóho ta cúú á rey nuú ndaja táhan rey. Ta xoo Jesús cán canduu na nacana Ndióxi, mé na nacaxi a cacomí a cuéntá saha. Cúú ná na coó najándacoo ña cándeé ini na mé á —nacachi táto Ndióxi xihín i.

¹⁵Tá nandihí já nacachi tucu táto Ndióxi cán já xihín i:

—Ticuí, dó naxinún nu íin coo ñá xíca jii jan cúú dó yuhú nuu ndijáá ñuu xihín ndijáá nación xihín ndijáá ñayivi, na cáhan tá nuú tuhun. ¹⁶Ta ndíhuxu ndíqui naxinún nuú quití quini jan cúú á yuhú nuu mé uxu rey, na

candají ñá xíca jii jan. Ta jándacoo na ña ta já caca lahla ñá. Ta caxí ndáá na yiquí cuñu ñá. Ta chicaan ñúhu ná ña xihín ñúhu cáyi. ¹⁷Jáchí jáxinu Ndióxi ini na cán ña ná caja na ña cúni mé á. Ta jándique táhan na cán tuhun na ña ná ndiquiahva na chuun ndójo na nu mé quití quini cán ña ná cacuu rí tátuhun rey janda quiahva ná xinu coo nuú ña nacachi Ndióxi coo. ¹⁸Ta ñáñáha naxinún cán cúu ñá yuhú nuu ñuu cáhnu cán ña sáhná chuun nuú ndaja táhan na cúu rey —cáchi táto Ndióxi cán.

Tá jándihi Ndióxi sahá ñuu Babilonia

18 Tása nayaha tóco ndihi ña yóho já naxini i inga táto Ndióxi, ña ndójo chuun cáhnu ta nanuu a chí indiví. Ta chí nandiyihvi ndaa jatá ñuyívi xihín quiahva yéhe mé táto Ndióxi cán. ²Ta já nacasáha cáyuhú cóhó a já cáchi a já:

—Ay, ay, sa nandihí va sahá ñuu cáhnu Babilonia cán ta nanduu a tátuhun cavá tiñáha. Cúu á tátuhun nuú nandicutú ndaa ínima quini ñúhu rí. Ta nanduu a tátuhun in choho nu ñúhu tá nuú laa quini, rí cándají ñayivi. ³Nandihí sahá ñuu Babilonia yóho, mé a cúu tátuhun in ñáñáha xíca jii. Jáchí najáxini ñá ndaja táhan ñayivi ndúu ñuyívi ta najácahan ñá na ña ná caja na tá nuú ña núu ña xíca ini na caja na. Ta mé na ñuu Babilonia jan nasahan na ñamaní ña ná xinu coo ndaja táhan da náhnu sáhná chuun nuú nación ña ná xinu da ñuu Babilonia jan cuju da xihín ña xíca jii jan. Ta na cája ndahvi ndicuícá na xihín tá nuú ña núu caja ñá jáchi sátá johó ñá ña cuícá ña —cáchi táto Ndióxi cán.

⁴Tá nandihí já naxini johó i inga cáhan chí indiví ta já cáchi a já:

—Ndóhó, na cúu cuénta mí i, cuáqueta ndó jatá ñuu jan já ná a cája ndó cuachi cája na ñuu jan. Ta já ná a xinu coo tondóhó vaxi nuú na ñuu jan jata ndo. ⁵Jáchí sa nacacuahá ndivaha cuachi na ta janda indiví xinu coo cuachi na. Ta co ndíndójo Ndióxi sahá cuachi cája na. ⁶Ta tá quiahva nacaja na jan xihín inga ñayivi quiahva já ndítahan caja ndó xihín ná viti. Ta janda ivi táhndá chága ví ndicó coo ndó caja ndó xihín ná. Ta tá quiahva najácoho na jan inga ñayivi quiahva já ivi táhndá chága ví ndítahan quiahva ndó nu ná coho na. ⁷Nandínehe jícó ndivaha na mé ná sahá ña cán quéa ndítahan jándoho ndivaha ndó ini na viti. A juú quiahva nanduu cuícá na sahá ña cán quéa ndítahan caja xíxi ndó xihín ná viti. Cáhan na ña cahnda na chuun nuú in nación. Ta cáhan na ña a ndóho toho ini na. Ta cáhan na ña co cúu ná tátuhun in ña cuáan. ⁸Sahá ña cán quéa tixi in tálaá quivi quixi tá nuú ña núu nu ná. Já casáha quivi na ta cacuéha ndivaha ini na ta xinu joco nu ná. Ta já chicaan Ndióxi na nu ñúhu cáyi jáchi jándihi Ndióxi, xitoho í saha ná, mé a íin ndée cája tóco ndihi ñaha —cáchi a.

⁹Ta já casáhá cuacu ndijáá rey, na sáhndá chuun nuú ñayivi ndúu ñuyiví. Ta tahnda ini na tá ná cuni na ñihma cána ñuu Babilonia cán. Jáchí mé na náhnu yóho naquihvi nuu na xihín ñá xíca jii cán ta najátiví na jiihún na xihín ña. ¹⁰Ta xíca xíca nasacandichi na jáchí yíhví na sahá ndá quiahva quini ndóho ini ñá cúu yuhú nuu ñuu Babilonia cán. Ta já casáhá cáchí mé rey cán já:

—Ay, ay, ndáhví nahá nacuu ndó, ñuu Babilonia jáchí vatí cúu ndó ñuu cáhnu ndivaha joo in too johu naxinu hora ndóho ini ndó —cáchí na cán.

¹¹Ta ndijáá na cája ndahví ndúu ñuyiví cuacu ri na cán va ta tahnda ndivaha ini na sahá ñuu Babilonia jan jáchí a cóo ga na cueen ñaha ndójo na xinu coo na. ¹²Ta ña sádojo na cán quixi na jicó na cúu jiihún cuáán xihín jiihún cúxú xihín yuu yahvi ndivaha xihín perla vaha xihín jahmá vaha ndivaha ña cávaha xihín yahva naní lino xihín jahmá seda xihín jahma ndíhí ticayí xihín jahma cuáhá nii xihín ndijáá nuú yíto támi sahan xihín ñaha cávaha xihín nuhu yócó elefante xihín ndijáá yitó yahvi ndivaha xihín ndijáá ñaha cávaha xihín caa cuáán xihín ña cávaha xihín caa uun ta jari ñaha cávaha xihín yuu naní mármol. ¹³Ta quiahva já sáñehe na canela xinu coo na xihín ndijáá ñaha támi sahan. Ta ñehe na jusa xihín mirra xihín perfume viti. Ta quiahva já ñehe ri na vino xihín aceite xihín harina vaha xihín trigo. Ta quiahva já sáñehe ri na quití xójo xihín ndicachi xihín cuáyí xihín carreta. Ta janda ñayivi xéen na caja chúun nu ná sáñehe na. Ña yóho sádojo na quíxi na joo ni in na a cuéen ga ñaha na. ¹⁴Ndijáá na cája ndahví cán cahan na xihín ñuu Babilonia cán já cachi na já:

—Coó ga cuihi vaha, rí catóo nahá ndó caxí ndó. Ta viti sa nandihi saha tóco ndihi ña lándá xihín ña cuicá nasanduu nu ndó jan —cáchí na.

¹⁵Ta na nacaja ndahví xihín tóco ndihi ñaha yóho nandicuicá ndivaha na xihín ndahví nacaja na xihín na ñuu Babilonia cán. Ta xíca xíca candita na candehe na ñuu Babilonia cán jáchí yíhví na ndoho na tá quiahva ndóho ini na cán. Ta cuacu ndivaha na ta tahnda ndivaha ini na. ¹⁶Ta já cáchí na já:

—Ay, ay, ndáhví nahá nacuu ñuu cáhnu Babilonia jan. Ndató ndivaha nasanaha ñuu yóho tátuhun in ñañáha ndíxi jahmá lino vaha ndivaha xihín jahmá ndíhí ticayí xihín jahmá cuáhá nii. Ta nacacutú ña xihín jiihún cuáán ta xihín yuú yahvi ndivaha ta xihín perla. ¹⁷Joo in too johu nandihi saha tóco ndihi ña cuicá nasacomí mé ñuu Babilonia jan —nacachi na.

Ta ndijáá na sáhndá chuun nuú na ñehe barco, xihín ndijáá na cándójó xíca xihín ndijáá na cája chúun ini mé barco cán xihín ndaja táhan na cája ndahví xihín ña quixi chí tañuhú cán nasandita xíca na sáñehe na. ¹⁸Ta tá naxini na ndíndita ñihma ña cáyi ñuu cán já nacayuhú na já nacachi na já:

—Ni in túhún toho inga ga ñuu co quée táhan xihín ñuu Babilonia ña cáhnu yóho —nacachi na.

¹⁹Ta xihín ña táhnda ini na nāchojó na ña yácá jiní ná. Ta nācasáhá sácu ndivaha na já cáyuhú na já cáchí na já:

—Ay, ay, ndáhví nahá nacuu ñayivi nasanduu ñuu cáhnu jan jáchi xihín ña cuicá nasacomí na najácacuicá na ndijáa da xíca nuú tañuhú xihín barco. Joo in too johó nandihí sahá ña jan —cáchí na cán sácu na.

²⁰Ta ndítahan cajii ini na ndúu indiví sahá ña nandoho ñuu cáhnu yóho. Ta quiahva já ndítahan cajii ri ini ndijáa na cúu cuéntá Ndióxi xihín na cúu apóstol xihín na cúu profeta. Jáchi xihín ña nācāja Ndióxi xihín ñuu Babilonia yóho nandiquehe a cuéntá sahá ña núu nācāja mé na cán xihín ndó, na cúu cuéntá Ndióxi.

²¹Tá nandihí já naxini i in táto Ndióxi, ña íin cuaha ndée. Ndínehe a in yuu cáhnu ña cúu á tátuhun in yuú yojó. Ta najácana a ña ini tañuhú ta já nācachi a já:

—Tá quiahva najácana i yuú yojó yóho ini tañuhú ta nasacoo a cahá tañuhú cuahan quiahva já yaha ri xihín ñuu Babilonia. Vatí cúu a in ñuu cáhnu ndivaha joo anda ama cáa quivi a ndícó coo ga ñayivi cuni na ña.

²²Ta ni música a tácu ga mé ñuu jan ta ni a cáha ga arpa ni tóyoó ni trompeta. Ta ni in ga ñayivi a cája chúun ga ñuu jan jáchi ni in túhún toho ndahvi a cája na. Ta ni a tácu ga yuú yojó ña ndíco najihí. ²³Ta janda ni in íti loho a túun ga ñuu jan. Ta ni a cáhan ga ñayivi vicó tándaha jáchi coo ga ña jan coo. Jáchi na najícó ñaha cán nasacuu na na náhnu ndúu ñuyíví ta najándahvi na ndaja táhan ñayivi ndúu ñuyíví xihín ña tají nācāja na —cáchí táto Ndióxi.

²⁴Ta ndoho ini na jáchi mé ñayivi ñuu Babilonia jan nasahní na na profeta xihín na cúu cuéntá Jesús ta anda cuahá ñayivi ndijáa ñuu ñuyíví nasahní nahá na.

19 Tása nayaha tóco ndihí ña yóho já naxini johó i cáhan cóhó cuahá ndivaha ñayivi indiví ta já cáchí na já:

Cáhnu cúu Ndióxi jáchi in túhún mé á quēa jácacu mí.

Ta íin ndée mé á cāja tóco ndihí ñaha ta cáni nu yó cāja cáhnu ndivaha í mé á.

²Jáchi ndaa cája ndihí mé á ñaha tá cája víi a sahá ñayivi.

Ta ndaa nācāja mé á tá nasacu ini a jándihí a sahá ñuu Babilonia jan jáchi nasacuu a tátuhun ñá xíca jii.

Jáchi xihín tóco ndihí ña núu nasacāja ñá ña quíji ñá xihín na co cúu yíi ña najátiví ndihí ña ñayivi ndúu ñuyíví.

Sahá ña cán quēa najándihí Ndióxi saha ña ta já nātahnda cuéntá sahá ña nācāja ñá tá nasahní ñá na cúu cuéntá Ndióxi, cáchí na cáhan indiví cán.

³Tá nandihí já nācasáhá tucu na cán cáhan na já cáchí na já:

—Cáhnú cúú Ndióxi jáchi nácaja mé á ña cáyi ñuu cán ta anda ama cáa quivi ndíndita ñihma ña —já cáchí na indivi cán.

⁴Ta ndíhoco comí na sacuahá ndúu cán xihín ndícomi mé ña tácu cán náxítí na janda quiahva nacani ndaa taan na nu ñúhu ta já nácaja cáhnú na Ndióxi, mé a íin coo nu sácco rey cán. Ta tá cája cáhnú na Ndióxi já cáchí na já:

—Já ná coo. Cáhnú cúú Ndióxi —cáchí na.

⁵Ta janda nu íin coo Ndióxi cán náxini johó i cáhan in a ta já nácachi a já:

—Tóco ndihi ndó, na cája chúun cuéntá mé á xíní ñúhú caja cáhnú ndó Ndióxi, mé a cája cáhnú í. Coó caja toho a á cúú ndó na náhnú á na valí jáchi cája ndó ña sáhdá mé á —cáchí a.

Tá coo víco indivi sahá ña ndiquehe Jesucristo na cúú cuéntá mé á

⁶Ta nandihí já náxini johó tucu u ña tácu tátuhun tá cáhan cuahá ndivaha ñayivi. Ta tácu ña tátuhun tá cáha cúyu ticuií tañu cáva ta tácu ña tátuhun tá cána tasa. Ta já cáchí na já:

Cáhnú cúú Ndióxi, xitohó í, mé á cája cáhnú í jáchi sa nácasahá mé á cómi a cuéntá sahá ñayivi viti.

Ta íin ndée mé á caja tóco ndihi ñaha.

⁷Xíní ñúhú cavatá yó ta xíní ñúhú cajii ndivaha iní caja cáhnú ndivaha í mé á.

Jáchi sa náxinu coo quivi ndiquehe Jesucristo, mé a cúú tátuhun ndicachi loho, na cúú cuéntá mé á.

Cacuu a tátuhun tándahá Jesucristo xihín na cúú cuéntá mé á, na sa ndúu tiaha na tándahá na xihín mé á.

⁸Ta ñehe táhvi ná candixi na jahmá vaha ndivaha, ña naní lino ta cúú á ña víi ndivaha ta ndató ndíyihvi a, cáchí na.

Jáchi mé jahmá víi ña naní lino cán náha ña náxica vaha na cán íchi cuéntá Ndióxi.

⁹Ta nandihí já nácachi mé tátó Ndióxi já xihín i:

—Cahyún ña yóho. Cajii ini ñayivi, na nacana Ndióxi cuhun indivi tá ná xinu coo quiví ndiquehe Jesucristo, mé a cúú tátuhun ndicachi loho cán, na cúú cuéntá mé á —nácachi tátó Ndióxi cán xihín i.

Ta nácachi tucu a já:

—Mé a ndaa ndinuhu tuhun Ndióxi cúú ña yóho —nácachi a xihín i.

¹⁰Anda já náxítí i nu tátó Ndióxi cán ña ná caja cáhnú i ña. Joo já nácachi a já xihín i:

—A cáxítí tohún nuú yehe jáchi ndítahan caja cáhnún Ndióxi. Jáchi yehe cúú u dá cája chúun nu Ndióxi tá quiahva cája chúun yóhó xihín java

ga na cúú cuéntá Jesús, na cúú ñanún, na co jándacoo cáhan ña ndaa, ña najánaha Jesús nuú ñayivi. Caja cáhnún Ndióxi —cáchi a.

Jáchi na cúú profeta cándeé ini na ña jánaha Jesús ña ndaa sahá ña cán quéa cáhan na ña nuú ñayivi.

Tá naxini Juan in a cánúu cuáyí yaa

¹¹Tá nandihi já naxini i nanuna indiví ta naqueta in cuáyí yaa. Ta mé a cánúu rí cán naní a: mé a co cáva ivi joho ini. Ta naní tucu a: ña ndaa. Jáchi ndaa cája vií a sahá ñayivi ta ndaa cája mé á tá quíhvi táhan cáni táhan xihín ná. ¹²Ta tá quiahva yéhe nu cándaa ñúhu cáyi quiahva já yéhe nduchú núú a. Ta cándojó cuahá ndivaha tiyivi jini á. Ta ndaa in quivi taan mé á joo in túhún mé á xini ndá quivi quéa ndaa taan. ¹³Ta nandaxi jáhma mé á xihín nii. Ta naní a: tuhun Ndióxi. ¹⁴Ta naxini i ndíco in táhndá cáhnu soldado cuéntá indiví jatá cuahan na xihín á. Ta ndíxi na jahmá vaha ña naní lino. Ta cúú á jahmá yaa cachi, ña ndató vií ña. Ta in in na cán cánúu cuáyí yaa cásahan na xihín á. ¹⁵Ta yúhu mé á ña cúú tuhun Ndióxi cán quéta in yúchu cáni ña jeen ndivaha. Ta xihín mé yúchu jeen cán jándicuehe quini ndivaha mé á ndijáa ñayivi ndúu ñuyíví. Ta cahnda ndeé mé á chuun saha ná. Ta cája vií a saha ná tá quiahva cája da sání nihni jatá uva ini pila ña ná cuhní rí. Ta mé Ndióxi cúú á jándoho ndivaha ini ñayivi jáchi xójo ndivaha ini mé á xihín ná ta mé á cúú á Ndióxi ña íin ndée caja tóco ndihi ñaha. ¹⁶Ta jatá jáhma ndíxi mé a cán xihín nu jíhin a ndaa java tuhun já cáchi ña já: “Yehe cúú rey nuú ndaja táhan rey ta cúú u xitoho nuú na náhnu ndúu ñuyíví”, cáchi a.

¹⁷Tá nandihi já naxini i in tátó Ndióxi cándichi a jatá candii. Ta já nacayuhú cóhó a nuú ndijáa laa, rí ndáchi nu táchi. Ta já nacachi a já xihín rí:

—Naha ndihi ndó taca ndó cajíni ndó ña quiahva Ndióxi nu ndo. ¹⁸Ta ña caxí ndo cacuu a yiquí cuñu na náhnu, na sáhná chuun nuú ñayivi. Ta caxí ndo yiquí cuñu na cúú sacuahá nu soldado xihín yiquí cuñu na ndacú. Ta caxí ndó yiquí cuñu cuáyí xihín yiquí cuñu da cándojó jatá rí. Ta caxí ndó yiquí cuñu na xíca núná mé xihín na cómí xitoho cuéntá saha. Ta quiahva já caxí ndó yiquí cuñu na valí xihín na náhnu viti —cáchi a.

¹⁹Tá nandihi já naxini i rí cúú quití quini cán nataca rí xihín na náhnu, na sáhná chuun nuú ñayivi ndúu ñuyíví ta xihín soldado na. Nataca na cani táhan na xihín mé a cánúu jatá cuáyí yaa cán xihín soldado mé á.

²⁰Ta natiin mé á quití quini cán xihín da cúú profeta túhún, mé da nacaja ña xitúhún nu mé rí cúú quití quini cán. Jáchi xihín ña xitúhún nasacaja mé profeta túhún cán najándahvi da ñayivi ta najácahan da na ña ná nani marca mé rí quini cán yiquí cuñu na. Ta já nacaja cáhnu na tiniñu yúu rí.

Ta naxini i najácana tácu Ndióxi mé quití quini cán xihín profeta túhún cán ini indayá, ña cúu tátuhun in miní nu cándaha ñúhu cáyi xihín azufre. ²¹Ta na java ga cán naxihi na xihín yúchu cáni ña naqueta yúhu mé a cánúu jata cuáyí yaa cán. Ta ndijáa laa natata ndihi rí caxí rí yiquí cuñu na janda quiahva nandivaha ini rí.

Cáhan Juan sahá in mil cuia tá ná candico ndaa tiñáhá sacuahá

20 Tánandihi já naxini i nanuu in táto Ndióxi chí indiví ta ñéhe a yávi ña súná yuhú yávi cúná, ña co xínu nu ndíhi nuu cán. Ta cáñee in cadena ndeé ndáha á. ²Ta natiin mé á coo quini, rí cúu tiñáhá sacuahá naní Satanás, rí nasahin janda saha. Ta natató a rí xihín cadena cán tixi in mil cuia. ³Ta najácana a rí ini yávi cúná nuu nachicaji a rí. Ta nasacu a in sello yuhú yéhe nu ndácaan rí já ná a queta rí jándahvi rí ñayivi ñuyiví janda quiahva ná yaha mé in mil cuia. Ta tá sa nayaha in mil cuia já janí tucu rí caca nuu rí tixi chá tiempo cuití va.

⁴Tá nandihi já naxini i ndíta cuahá táyi vaha nu ndúu coo na candojo chuun ña caja vií na sahá ñayivi. Ta quiahva já naxini rí cán ndúu ínima na nachitúhun na yiquí jíní na jáchi nacahan na tuhun Ndióxi, ña ndaa najánaha Jesús nuu ñayivi. Ta cúu ná na coo nacaja cáhnu quití quini cán xihín tiniñu yúu rí. Ta ni coo nasahan na ñamaní nani marca rí taan na ni ndáha ná. Ta naxini i nanditacu tucu mé na cán ta anda jávi mé ná xihín Jesús nasacomí na cuénta sahá ñayivi tixi in mil cuia. ⁵Ta na yóho cacuu na nu cuítí nditacu tucu. Joo java ga na naxihi cán camaní nditacu na jáchi ndítahan nu ná candati na janda quiahva ná yaha in mil cuia. ⁶Cajii ini ñayivi, na nditacu tañu na jánditacu Ndióxi nu cuítí cán jáchi cúu ná na nandicaxi mé á. Jáchi a cúhun toho na indayá nu ndoho ini ñayivi quini. Ña cán cacuu a tátuhun quivi na chí ivi. Ña yaha xihín ná quéa nduu na jutú caja ndíví na nu Ndióxi xihín nuu Jesucristo. Ta xihín mé á cacomí na cuénta sahá ñayivi tixi in mil cuia.

⁷Ta tá sa ná yaha in mil cuia cán já janí Satanás, mé tiñáhá sacuahá nu ndácaan rí ndájí rí cán. ⁸Ta já queta rí jándahvi rí ndijáa ñayivi ndúu ñuyiví. Ta jándahvi rí ñayivi ndúu ñuu naní Gog xihín ñuu naní Magog ña ná taca na caní táhan na. Ta na soldado taca cán cacuu na tátuhun ñutí ndúu yuhú tañuhú xihín ña cuahá cúu ná. ⁹Ta ndicuítá nuu ñayivi ndijáa ñuu ñuyiví ta cava yivi na jatá tóco ndihi na cúu cuénta Ndióxi. Ta quiahva já cava yivi na jatá ñuu Jerusalén, mé ñuu ña quíhvi ini Ndióxi. Joo jácuuyu Ndióxi ñúhu cáyi indiví ta jándihi a saha ná. ¹⁰Ta mé tiñáhá sacuahá, mé rí najándahvi ñahá cán jácana Ndióxi rí ini in miní nu cándaha ñúhu cáyi xihín azufre. Ta sa mé cán cúu nu jácana mé á quití

quini xihín dā cúú profeta túhún. Ta cán cañuhu na ndoho ini na ñuú ta ndiví anda ama cáa quiví.

Tá cája vií Ndióxi sahá ñayivi

¹¹Tá nandihí já naxini i in táyi cáhnu, dó yaa cachi nu sácoo Ndióxi. Ta nuu mé á nandíñuhú tóco ndihí ñuyíví xihín indiví ta chí a vája ga cuu cuní ña. ¹²Ta naxini i ndijáa na sa naxihí, na válí xihín na náhnu ndíta na nu íin coo Ndióxi. Tá nandihí já naxini i nanuna nuú java libro. Ta nanuna inga libro nu ndáa quiví tóco ndihí na catacu anda ama cáa quiví. Ta já nacavií sahá ña nacaja in in na sa naxihí cán jáchi ini mé libro cán ndáa tóco ndihí ña nacaja in in ñayivi. ¹³Ta nandindita tóco ndihí na naxihí ini tañuhú xihín na nanduxu já ná caja vií Ndióxi sahá ndihí na tá quiahva cáa nacaja in in na cán. ¹⁴Janda jávi a quiví ga ñayivi ta a cúhun ga ínima na nuú nataca ínima na naxihí. Joo najácana Ndióxi ñayivi quini ini mé mini nu cándaha ñuhu cáyi. Mé mini cán cúú á indayá nuú ndoho ini ñayivi ta cúú á tátuhun quiví na chí iví. ¹⁵Ta mé cán cúú nuú najácana Ndióxi tóco ndihí na co ndáa quiví nu mé libro nu ndáa quiví ñayivi catacu anda ama cáa quiví.

Tá naxini Juan indiví saá xihín ñuyíví saá

21 Tánandihí já naxini i indiví saá xihín ñuyíví saá. Jáchi sa nandihí va sahá indiví xihín ñuyíví ña nu cuítí cán. Ta jári tañuhú sa coó ga dó ñuhu viti. ²Ta yehe, dā cúú Juan naxini i nanuu ñuu Jerusalén saá, ña yíi ta naquixi a chí indiví nu íin Ndióxi. Ta tá quiahva ndató cácutú in ñáñáha tándaha ndiquehe ña yíi ña quiahva já ndató nacacutú ñuu Jerusalén cán. ³Tá nandihí já naxini johó i nacayuhú cóhó a chí indiví ta já cáchi a já:

—Ndióxi íin a tañu ñayivi viti jáchi cúú ná cuéntá mé á. Ta coo a xihín ná jáchi cúú á Ndióxi, mé á cája cáhnu na. ⁴Ta mé á yaco ndihí a ticuítí nuu ná ña nasacu na. Ta a quiví ga na. Ta ni a cuácu ga na. Ta ni a táhnda ga ini na. Ta ni a ndíhíhvi ga na. Jáchi sa najándihí Ndióxi saha tóco ndihí ña cán, ña nasahíin jihna —cáchi a.

⁵Ta mé a íin coo nu sácoo rey nacahan ta já nacachi a já:

—Candehé. Yehe ndája saá i tóco ndihí ñaha.

Ta já nacachi tucu a já:

—Cahyún tóco ndihí ña cáhan i xuhun yóho jáchi cúú á ña ndaa ta cuu candee ini ndó ña —cáchi a.

⁶Tá nandihí já nacachi tucu a já xihín i:

—Sa najáxinu coo i tóco ndihí ñaha. Yehe cúú u nu cuítí ta yehe cúú u nu ndíhí jáchi janda tá cámaní cava sahá saha tóco ndihí ñaha sa íin va

yehe ta coo tá coo i vatí ná ndihi sahá. Ta ndá na cúni candaá chága ini sahá yehe já caja i ña ná cuu candaá ini na sahá i. Ta cúu á tátuhun íchi ini na ticuí, dó cája ña ná catacu na anda ama cáa quivi. Ta coó toho yahvi quehe e nu ná saha do. ⁷Ta ndá na ná cana vaha nu tóco ndihi ña núu ñehe táhvi na ndiquehe na tóco ndihi ña yóho nuú i. Ta yehe cacuu u Ndióxi, mé á caja cáhnu na ta mé ná cacuu na jahyi i. ⁸Joo na láhá xihín na coo cúni candúsa tuhun Ndióxi xihín na cándají na cúu cuéntá Ndióxi, mé ná cán cuhun na indayá nu cándaha ñúhu cáyi xihín azufre. Ta cán cuhun ri na sáhní ndii xihín ndijáá na ndúu xihín na coo cúu yíi á ñájíhi na. Ta cán cuhun ndijáá na cája tá nuú ña tají xihín na cája cáhnu yoco xihín na cáhan ña tuhún. Ña yóho cacuu a tátuhun quivi na chí ivi jáchi ndoho ndivaha ini na ini indayá nu cándaha ñúhu cáyi xihín azufre —cáchi a.

Cáhan Juan sahá ñuu Jerusalén saá

⁹Ta ndaja coo in táhan ndíhusa táto Ndióxi ña ñehe usa coho nu ñúhu usa ña núu quixi jatá ñuyívi naxinu a nuú i ta já nacachi a já xihín i:

—Naha quíi yóho candehún. Jáchi jánaha i nuun na cúu cuéntá mé a cúu tátuhun ndicachi loho. Na yóho cúu ná tátuhun in ña tándaha ta Jesucristo cúu á tátuhun yíi ña —cáchi a.

¹⁰Anda já nacaja ínima yíi Ndióxi xihín i ña ndáca táto Ndióxi yehe já nasahan i in yucu jícó ña cáhnu. Ta cán naxini i ñuu Jerusalén ña yíi, ña nanuu chí indiví nu íin Ndióxi cán. ¹¹Ta mé ñuu cán ndató ndivaha yehe ña jáchi cája mé á ña ná ndiyehé ña. Ta jíñu ña tá quiahva jíñu yuu yahvi ndivaha tátuhun yuu jaspe. Ta cúu á tátuhun yutátá jáchi cuu candehé yó chíhini a janda inga xoo a. ¹²Ta jatá mé ñuu cán nacava nuu in náma yuu cáhnu ta jícó ndivaha. Ta nasahiin uxu ivi yéhé a nu ndíta in in táto Ndióxi in in yéhé a. Ta ndíca yéhé cán ndáa quiví ndíhuxu ivi táhndá na naquixi chichi Israel. ¹³Ta uní yéhé sándehe nu xoo cána candii. Ta uní yéhé sándehe nu xoo chí norte. Ta uní yéhé sándehe nu chí sur. Ta uní yéhé sándehe nu xoo quéta nuu candii. ¹⁴Náma yuu ñuu Jerusalén cán nasahiin uxu ivi yuu ndúhu saha. Ta jatá yuu cán ndáa quiví ndíhuxu ivi na apóstol, na naxica tuun xihín Jesús, mé a cúu tátuhun ndicachi loho cán.

¹⁵Mé táto Ndióxi ña cáhan xihín i cán cánee in tóyoó jiuhun cuáan ndáha ña ná chiquiahvá mé á ñuu cáhnu xihín yéhé a xihín náma yuu ña ndájí jatá. ¹⁶Ta nachiquiahvá a ña xihín tóyoó cán ta in quiahva ndáa ndícomí xoo mé ñuu cán ta chí in quiahva cáni a ta in quiahva ndíca ña. Ta quiahva ñehe a cúu á ivi mil ivi ciento kilómetro. Quiahva já cáni ña ta quiahva já jícó ña ta quiahva já ndíca ña. ¹⁷Tá nandíhi já nachiquiahvá táto Ndióxi cán náma yuu ndájí jatá ñuu cáhnu cán. Ta quiahva ñehe a cúu

uni jico comi metro. Ta metro cája chúun táto Ndióxi cán cúu dó tátuhun dó chíquiahvá ñayivi ndúu ñuyívi ñaha.

¹⁸Ta mé náma yuu ndájí jatá ñuu cáhnu cán nacavaha ña xihín yuu jaspe. Ta mé ñuu cáhnu cán nacavaha ña xihín jiuhun cuáán, ña cúu tátuhun yutátá ña víi ndivaha nuu. ¹⁹Ta mé yuu ndúhu ña nacana saha mé náma yuu cán nacacutú a xihín tá nuú yuú yahvi ndivaha. Yuu ndúhu nu cuítí cán nacacutú a xihín yuu naní jaspe. Ta ña cáhivi cán nacacutú a xihín yuu naní zafiro. Ta ña cáhuni cán nacacutú a xihín yuu naní ágata. Ta ña cácomi cán nacacutú a xihín yuu naní esmeralda. ²⁰Ta ña cáhuhun cán nacacutú a xihín yuu naní ónice. Ta ña cáhiñu cán nacacutú a xihín yuu naní cornalina. Ta ña cáhusa cán nacacutú a xihín yuu naní crisólito. Ta ña cáhuna cán nacacutú a xihín yuu naní berilo. Ta ña cáhiin cán nacacutú a xihín yuu naní topacio. Ta ña cáhuxu cán nacacutú a xihín yuu naní crisoprasa. Ta ña cáhuxu in cán nacacutú a xihín yuu naní jacinto. Ta ña cáhuxu ivi cán nacacutú a xihín yuu naní amatista. ²¹Ta ndíhuxu ivi yéhe ini ñuu cáhnu cán cúu á uxu ivi perla. Ta tá in tá in yéhe cán nacavaha xihín in tálaá perla níi. Ta mé cáyé cáhnu ñuu cán cúu á ña nacavaha xihín ndinuhu jiuhun cuáán, ña cúu tátuhun yutátá jáchi janda inga xoo a tívi.

²²Ta ni in túhún veñuhu coó naxini i ini mé ñuu cáhnu cán. Jáchi mé Ndióxi, xitoho í, mé a íin ndée cája tóco ndihi ñaha cúu á tátuhun veñuhu na. Ta jári Jesús, mé á cúu tátuhun ndicachi loho cán cúu á tátuhun veñuhu na. ²³Ta mé ñuu cáhnu cán co xíní ñúhú toho a candii ni yoo ña ná jándiyehé ñahá jáchi xihín quiahva yéhe Ndióxi cán jándiyehé a mé ñuu cán. Ta Jesús, mé a cúu tátuhun ndicachi loho cán cúu á tátuhun lámpara jándiyehé a ñuu cán. ²⁴Ndijáá ñayivi, na naquixi ndijáá nación ñuyívi caca nuu na ini ñuu cáhnu cán xihín quiahva yéhe a. Ta ndijáá na sáhndá chuun nuú ñayivi ñuyívi xinu na ñuu cán ta ndiquiahva na tóco ndihi ña cuicá cómi na nu mé ñuu cán. ²⁵Ta a cándaji toho yéhe a tá ndiví ta coó toho ña nuú coo cán. ²⁶Ndijáá ña cuicá xihín ña náhnu cuéntá ñayivi ñuyívi yóho cañehe na ña nu mé ñuu cán. ²⁷Joo ni in túhún ña quini a quíhvi toho ini ñuu cán. Ta ni in na cája ñaha cándají Ndióxi a quíhvi cán. Ta ni na catóo jándahvi ñayivi a quíhvi cán. Na ndíhvi cán cuítí va cúu ná na ndáa quívi nu libro nu ndáa quívi tóco ndihi na catacu anda ama cáa quívi. Mé libro yóho íin a nuú Jesús, mé á cúu tátuhun ndicachi loho.

22 Tánandihí já najánaha táto Ndióxi cán in yuta víi nuú i nu ñúhu ticuí, dó cája ña ná catacu ñayivi anda ama cáa quívi. Ta tá quiahva yéhe yutátá quiahva já yéhe nuu do. Ta cána dó chí xoo nu íin coo Ndióxi xihín Jesús, mé a cúu tátuhun ndicachi loho cán. ²Ta yáha dó mé mahñú ndáa íchi cáhnu mé ñuu cán. Ta in in xoo yuta cán sáhnu yíto, dó

cája ña ná catacu ñayivi anda ama cáa quivi. Ta tá yoo tá yoo cúun cuihi nu dó cán. Ta uxu ivi tañu cúun cuihi nu do nu cuía. Ta ndáha do cája ña ná ndivaha ñayivi ñuyiví. ³Ta cán ni in ga ñaha a cúhun chahan jata. Ta Ndióxi xihín Jesucristo, mé a cúu tátuhun ndicachi loho cán coo a nu sácoo rey mé ñuu cáhnu cán. Ta na cúu cuénta Ndióxi caja cáhnu na mé a cán. ⁴Ta cuni táhyí na nuu mé á ta candaa quivi mé á taan na. ⁵Ta cán coo toho ñuu coo. Ña cán quéa na canduu cán a cúní ñúhú ga na ñúhu lámpara ta ni a cúní ñúhú ga na ña ná yehe candii jáchi mé Ndióxi, xitoho na jándiyehe a nu ná. Ta cahnda na chuun tátuhun rey anda ama cáa quivi.

Sa cáyati quiví quixi Jesucristo

⁶Tá nandihí já nacachi táto Ndióxi cán já xihín i:

—Tuhun yóho cúu á ña ndaa ta cuu candeé inún ña. Jáchi mé Ndióxi, xitoho í, mé a cája ña ná cahan profeta, mé a cán quéa nachindahá a táto mé á já ná caxi tuhun a nuú na cúu cuénta mé á ña yachi quixi tóco ndihi ña yóho —nacachi a.

⁷Ta já cáchí Jesús já:

—Sa saa yachi va yehe. Cajii ini na cándusa tuhun cahan sahá ña yaha chí nuu, ña ndaa nu libro yóho —cáchí a.

⁸Yehe, da cúu Juan naxini johó i ta naxini ndihi i ña yóho. Ta tá nandihí naxini johó i ña ta tá nandihí naxini i ña já nacaxítí i nu táto Ndióxi ña caja cáhnu i ña jáchi mé a najánaha ña yóho nuú i. ⁹Joo nacahan táto Ndióxi cán xihín i já nacachi a já:

—A cáxítí tohún nuú yehe jáchi ndítahan caja cáhnún Ndióxi. Jáchi yehe cúu u da cája chúun nu Ndióxi tá quiahva cája chúun mún xihín ñanún, na cúu profeta cuénta Ndióxi xihín na cándusa ña cahan libro Ndióxi yóho —nacachi táto Ndióxi cán xihín i.

¹⁰Tá nandihí já nacachi tucu a já xihín i:

—A chíjehé tuhún sahá tuhun Ndióxi, ña ndaa nu libro yóho jáchi sa nacayati tiempo xinú nuu á coo a. ¹¹Joo ndá da cája quini ná caja quini chága da tá cúní da. Ta ndá da coo víí ná caca tiquíní mé dá tá cúní da. Joo ndá da vaha ná ndihi ini da caja da ña vaha. Ta ndá da nandiquiahva vaha mé ndáha Ndióxi ná ndihi ini da caca ndacú da íchi cuénta mé á —cáchí táto Ndióxi xihín i.

¹²Ta já nacachi Jesús já xihín i:

—Candehé. Sa saa yachi vi. Ta vaxi i ñéhe e yahvi quehe in in ñayivi. Ta ndiquiahva i nuú in in na ña ndítahan quehe na sahá ña nacaja na. ¹³Yehe cúu u nu cuítí ta yehe cúu u nu ndíhi jáchi jandá tá camaní cava sahá saha tóco ndihi ñaha sa iin va yehe ta coo tá coo i vatí ná ndihi sahá —cáchí a.

¹⁴Cajii ini ñayivi, na nandaja vii ínima jáchi cúú á tátuhun ndícata na jáhma ná já ná cuu ñehe táhvi na caxí na cuihi nuú yitó cuihi, dó cája ña ná catacu ñayivi anda ama cáa quivi. Jáchi xihín ña yóho cuu quihvi na chí yéhe ñuu cáhnu cán. ¹⁵Joo chí jata mé ñuu cán candoo tóco ndihi na naaan cája ña núu xihín tóco ndihi na cája ña tají xihín ndijáa na ndúu xihín na co cúú yíi ná á ñájíhí na. Ta jata ñuu cán candoo ri na sáhní ndii xihín na cája cáhnu yoco xihín na cáhan ña tühún xihín na jándahvi ñani táhan.

¹⁶—Yehe cúú Jesús ta nachindahá i táto mí i já ná caxi tühun a ña yóho xihín ndijáa na cúú cuéntá mí i, na ndítaca ndijáa veñuhu. Yehe nacaja i ña nacacu rey David ta naquixi i chichi mé David. Cúú u tátuhun quimi cáhnu, rí quéta tá nativi —cáchi Jesús.

¹⁷Mé ínima yii Ndióxi xihín na cúú cuéntá Jesús cana na Jesús ña ná quixi a ta já cachi na já:

—Naha quíi ndo.

Ta ndá na xini johó ña yóho xini ñúhú cachi ri na cán va:

—Naha quíi ndo.

Ta ndá na íchi ini ticuií, na cuni coho dó ná quixi na nu mé á já quiahva ticuií nu ná, dó caja ña ná catacu na anda ama cáa quivi. Ta coó toho yahvi quehe mé á nu ná saha do.

¹⁸Ta ña yóho quéa cuni cachi i xihín tóco ndihi ndó, na xini johó ña ndáa nu libro yóho: Ta ndá na ná chinúu chága tühun jata ña sa cáhan libro yóho já quéa chinúu ri Ndióxi tondóhó, ña ndáa nu libro yóho jata ná. ¹⁹Ta ndá na ná tavá tühun cáhan Ndióxi, ña ndáa nu libro yóho já quéa tavá Ndióxi quivi ná ña ndáa nu libro mé nu ndáa quivi tóco ndihi ñayivi catacu anda ama cáa quivi. Ta mé na cán a cuú quihvi na ñuu yii ndivaha cán ta ni a quiahva Ndióxi nu ná ñaha cáhan mé libro yóho saha.

²⁰Ta sahan Jesús tühun saha tóco ndihi ña yóho já cáchi a já:

—Mé a ndaa sa saa yachi vi —cáchi a.

Já ná coo. Naha quíi ndó Jesús, xitoho nde.

²¹Ña cuni quéa ná caja cuahá Jesucristo, xitoho í ñamaní xihín ndihi ndó. Já ná coo.